



			五	漢
		一	一	書
		四	三	門
二	一	九	九	
冊	架	函	號	類

				內
			五	漢
		一	一	書
		二	三	
元	函	架	冊	號
一	五	大		

載紀
一ノ二

內閣文庫	
番號	漢 5139
冊數	2(1)
函號	290 156



欽定四庫全書提要

漢書文庫

舊本題宋武勝軍節度使掌書記范垫巡官林
禹撰載錢鏐以下累世事蹟據舊目卷首列年
號世系圖諸王子弟官爵封諡表十三州圖十
三州考今惟存十三考州一篇其圖表俱佚後
附補遺一卷則不載作者名氏考陳振孫書錄
解題載錢俶之弟儼著吳越遺事有開寶五年
序又謂備史亦儼所作託名林范今是書四卷
之末有跋二首一題嘉祐元年四代孫中孚一
題紹興二年七代孫休渙如據書中所記而言

則當從錢鏐起算不當從錢俶起算所稱四代
七代顯據作書者而言則振孫以備史爲儼撰
似得其實錢曾敏求記云今本爲鏐十七世孫
德洪案吳越世家疑辨作十九世孫未詳孰是嘉靖間刊本序稱補
遺爲其門人馬蓋臣所續序次紊亂如衣錦城
建金籙醮及迎釋迦等事皆失載今是書於此
數事咸備無闕則非德洪重刊之本其以補遺
爲馬蓋臣所續亦別無證據蓋臣曾撰吳越世
家疑辨自序謂曾作備史圖表亦不云又續其
書考此補遺之首有序一篇不題名氏年月序

中有家王故事之語當卽中孚等所題亦云不
知作自何人則不出於蓋臣審矣備史所記訖
太祖戊辰補遺所記訖太宗丁亥與中興書目
所載前十二卷盡開寶元年後增三卷盡雍熙
四年者正合特併十二卷爲四併三卷爲一耳
陳振孫謂今書起石晉開運前闕三卷勘驗此
本所佚亦同則是書自宋季以來已非完帙今
無從校補亦姑仍其舊焉

卷第三

文穆王

忠獻王 忠遜王 附

卷第四 附補遺一卷

大元帥吳越國王

目錄終

吳越備史年號考

武肅王時

唐僖宗 乾符 廣明 中和 光啟 三文德一

昭宗 龍紀 一 大順 二 景福 二 乾寧 四 光化 二 天復 三 天祐 進昭肅 共四年

昭宣帝 用天祐年號在位三年

五代

梁太祖 開平 四 乾化 二 連均王二年共四年

均王 乾化 二 仍稱 貞明 六 龍德

唐莊宗 同光 三

明宗 天成 四 長興 四 王在二年薨

文穆王時

長興 三年 四年

閔帝 應順

吳越備史

王虎考

掃葉山房

吳越諸王子弟官爵封謚表

武肅王諸弟 武肅王諸子 文穆王諸子 忠獻忠懿諸子

鏢 湖州刺史

元璣

寧國軍節度使檢校太傅死陵侯封寧國公

宏傑

靜海軍節度使温州刺史封瓊山侯

惟治

奉國軍節度使宋時歷領節鉞特進檢校太師開府儀同三司左神武衛統軍彭城郡王

元瑛

兩浙節度副使中書令梁駙馬都尉封雲國公

宏儼

彰武軍節度使知福州加平章事謚節惠

鐸

睦州刺史領安南軍節度使同平章事

傳遜

靖江軍節度使校太傅同中書門下平章事贈司空永嘉侯

宏傳

王世子果州團練使檢校太尉謚孝獻

惟濟

檢校太保封邵王謚安僖

元懿

婺州刺史檢校太師中書令金華郡王謚宣憲

宏湛

宣德軍節度使湖州刺史檢校太尉同平章事封吳興郡王

鏹

温州刺史吳越國行軍司馬司空司徒檢校太尉同平章事封國公

元璋

中書節度使蘇州刺史檢校太師中書令開府儀同三司廣陵郡王謚宣義

宏億

奉國軍節度使檢校太師中書令右僕射謚康憲

昱

台州刺史宋秘書監判尚書省鄞州團練使贈太師封富水侯

鋸

衢州刺史

元球

靜海軍節度使檢校太師中書令開府儀同三司封扶南侯

宏偃

衢州刺史

鎰

鎮海軍節度副使

元珣

順化軍節度使明州刺史同平章事太保淮陰侯

宏信

知湖州宣德軍事官至光祿大夫開國伯檢校太傅持進誥謚宣公

郁

秀州刺史鎮東軍節度副使宋改知全州至太保封西平侯

鎮

睦州刺史

傳璠

湖州刺史太傅封新安侯

仁傲

婺州刺史武勝軍節度使

傳璟

湖州刺史檢校尚書右僕射梁駙馬都尉封雲國公

錄

蘇州安撫使

元琳

右千牛衛大將軍

文奉

中吳軍節度使檢校太尉中書令

餘姚侯

元瓚

知福州彰武軍事

封寧明王

右圖表武肅諸弟八人今圖者七人親子三十人今圖者十五人文穆親子十四人從子一百三十四人今圖者十五人忠獻忠懿親子六十八人今圖者四人而文僖不與焉從備史之所載也前存武肅之三世見王業之濫觴也後存忠懿之七世見王業之流澤也蓋起唐更五代與宋而終焉其餘諸子孫膺寵擅名者莫之勝載古之得國者自秦漢而下未之有也



十三州圖東南抵大海

貢道考
吳越貢道始自淮南饒信之間至虔州出湖南馬氏之地而入京師梁貞明四年淮人據虔州貢道遂絕由是航海入貢



淮南之地始自孫儒據之而楊行密則據宣城史初稱孫儒為淮南衛攻宣城而行密言急於武肅遂併師滅之故行密兼有淮南宣信之地國號吳故史又稱行密為吳後為南唐李昇所篡居金陵故又稱金陵蓋吳越之勍敵也吳越東南濱海西南二面當福州王氏地小力微不敢為室獨西北二面皆淮南之地兼之悍臣兩相攬攝遂無寧歲武肅自戰而始定而潤常竟不能復口口口口僅攻得其廣德無錫二縣忠懿南取福州而淮南境始感託諸地悉歸于周矣

杭州

餘杭 史中凡有指本州為別稱者放此

武肅初以破黃巢功高駟表為杭州都指揮使唐光啓三年因斬越州劉漢宏功拜刺史遂有杭州之地大順元年新夾城三十餘里 景福元年四月陞為武威軍 二年作羅城七十里 乾寧五年二月移鎮海軍於州 光化二年四月陞為都督府 梁開平二年陞為大都督府改唐山縣為吳昌縣 四年八月築捍海塘建侯潮通江等城門 附安國衣錦軍 武肅本鄉即今臨安 唐光化二年正月改石鏡鄉為廣義鄉臨水里為勳

貴里安眾營為衣錦營 天復元年五月陞為衣錦
城封石鏡山為衣錦山大官山為功臣山十月淮人
來侵 二年武肅親巡之作溝洫 天祐四年三月
陞為安國衣錦軍 梁乾化三年四月淮人來侵却
之 宋太宗時所上地圖言十三州一軍一軍疑即此

越州 會稽

唐乾寧二年董昌反武肅伐之三年五月平之十月
改威勝軍為鎮東軍拜武肅鎮海鎮東軍節度遂有
越州之地 梁開平二年陞為大都督府 謂之東府
湖州 吳興

唐乾寧四年九月刺史李繼徽將以州附淮南武肅
親巡其地遂有之 梁開平三年十月刺史高澧叛
焚義和臨平等鎮至四年導淮人入境三月武肅親
平之 周顯德六年四月陞為宣德軍

蘇州 姑蘇

唐光啓三年九月討徐約於蘇州是年城嘉興縣龍
紀元年三月破之遂有其地 大順二年宣城人攻
陷之 十一月淮南孫儒攻據之三年十一月燒掠
而去武肅圍復取之 乾寧二年九月淮南楊行密
救董昌圍之十月圍嘉禾三年五月城陷四年遣師

復之又自海道救嘉禾至五年始平 梁開平二年

九月淮人圍之遣師往援至三年四月命濟師始平

是年閏八月置吳江縣 乾化間築松江南北城鎖

柵 唐同光二年陞為中吳軍

秀州 嘉禾 嘉興

晉天福五年三月分蘇州嘉興崇德華亭三縣陞嘉

興為秀州

婺州 東陽 卽今金華

唐乾寧三年十一月淮人救董昌攻之四年遣師救

之 光化元年刺史王壇不用命十一月師圍之二

年六月又濟師至三年九月武肅親平之 天復三

年四月城之 七月睦州刺史陳詢叛攻蘭溪縣五

月睦州衢州兵及淮兵同攻之遣師往討八月又濟

師九月城陷益引淮人攻寇師復攻之至三年始平

晉天福五年三月陞為武勝軍

睦州 新定 卽今嚴州

唐乾寧四年淮人救董昌攻之 光化三年正月淮

人復攻之二月遁去 天復三年七月刺史陳詢叛

天祐二年淮人來援之遂與淮人及衢兵攻陷婺州

至三年正月武肅親平之

衢州 信安

唐乾寧五年十一月刺史陳岌叛討之至光化三年九月始平 天祐二年三月刺史陳章叛會睦州兵及淮兵攻陷婺州至三年二月平之 梁貞明四年六月淮人來侵刺史鮑君福逐走之

台州 臨海 丹丘

自得越州即服 梁開平二年改唐興縣為天台縣

温州 永嘉

唐天祐二年八月盧佶寇擾四年三月代之四月克之遂有其地

處州 縉雲

唐天祐四年四月討盧約五月納款遂有其地

明州 定海 即今寧波

梁開平三年四月刺史黃晟卒武肅巡之遂有其地因城望海鎮閏八月置望海縣 宋建隆元年六月

陞為奉國軍

福州 無諸 閩

晉開運四年十二月斬李孺贊遂取其地 乾祐三年南唐侵之尋平 周顯德間改威武軍為彰武軍右十三州創置始末考蓋武肅之始也由臨安得

吳越傳 卷首
杭得蘇常等州屬董昌反又得越方顧闳越遂失蘇常迨越平不暇顧常而遂復蘇州取湖州而衢婺等州最近杭越猶羈縻也於是乘其釁而挑其敝卒皆奴虜就降惟睦州最近淮南信州之地乃効力於國事方殷之時而造兵於干戈平定之後此在武肅提攜中故雖煽動二州誘外攘內而尋就撲滅既定西北由是溫處等州不能出我腔殼迨忠懿遂北攻常南恢福由是吳越益振而唐適削弱蓋始終與之低昂也然就武肅之失二州常潤而不靳靳於規復真益足以觀英雄之襟度自有所急而不屑屑於遠州

之得失者哉使得人而驅任之其鴻烈當未量也

論曰自唐末造百姓遭罹厄會英雄四起磨牙吮血而吞噬之幾無孑遺矣武肅始以二十騎却黃巢百萬之衆提八都兵斬漢宏連州之雄遏董昌之亂略掃孫儒之寇殘憐婺民而諭王壇示藏垢而納盧約未嘗無故勤兵而海塘之築萬世永賴當時兩浙之民其於塗爛何如也迨夫文穆忠獻奕世溫猷長爲東藩與淮人鼎視未嘗輕動戎馬境有災傷卽時振卹軍食苟足賜復三年忠懿繼世遂屢蠲逋租永爲定式荒田任開不起稅額邊

民鬻子官為贖還當時兩浙之民又何如也其大者舉數千里之國一旦挈而歸之太宗其不俟終日者乎嚮使知事機之不可而猶隱忍不舍如李煜劉繼元則兩浙之民又何如也百年昌化民知易姓而不知易國伊誰之力歟故其子孫代有聞人而繩繩不替至今益盛豈偶然哉

吾師

緒山先生實武肅之十九世孫將重刊備史以布先德病史文錯漫不便覽觀因指授蓋臣作諸圖考焉嘉靖甲午夏門人吳郡馬蓋臣記

吳越備史卷之一

宋 錢儼 撰

清 席世臣 訂

武肅王

武肅王姓錢氏諱鏐字具美杭州安國縣人即臨安縣也

唐武德中陪葬功臣潭州大都督巢國公九隴八代孫也大中六年壬申二月十有六日生於本縣之衣錦鄉勳貴里曾祖諱沛唐宣州旌德縣令累贈吏部尚書左僕射追封洪勝王曾祖妣童氏追封齊國太夫人祖諱宙累贈太尉追封建初王祖妣水邱氏累

封楚國太夫人追封晉國九華太夫人皇考諱寬威
勝軍節度推官職方郎中守太府少卿累贈禮部尚
書開府儀同三司守太師中書令追封英顯王皇妣
水邱氏累封秦國太夫人追封趙國太元太夫人王
卽長子也先是五年邑中大旱邑令命道士東方生
起龍以祈雨生曰茅山前池中有龍然不可起起必
大異邑令乃止明年復旱又召東方生起龍將臨池
遽指王所居曰池龍已生此家矣時王已誕數日始
誕之夕皇考方他適鄰人急走告曰適過君家後舍
聞甲馬之聲甚眾非有盜乎皇考乃馳歸王已誕矣

復有紅光滿室皇考頗怪之將棄於井祖妣知非常
人固不許因小字曰婆畱而井亦以名焉王自幼嘗
與羣兒聚戲於樹陰石上或伐薪必使羣兒聚以供
已隨多少而賞罰焉王嘗憩後山忽一石屹然自立
王因志之及貴建功臣精舍於其地遂以石爲佛坐
樹號衣錦將軍十三年冬十月皇祖太尉薨將葬之
夕大風拔樹於野詰旦術者引靈輜將就葬所謂王
考曰此拔樹之穴是天啓也宜以葬遂窆之畢術者
撫王曰當貴此孫耳王常遊徑山書院有道人洪謹
者每迎於門王頗惡之一日自後山僻徑而往謹亦

迎焉王問其故謹曰君非常人故預知耳

乙未乾符二年夏四月浙西鎮遏使王郢作亂敕本道徵兵討之時董昌戍石鏡鎮亦募鄉里之眾以副召王王遂委質於董氏始為偏將王入軍中驍勇絕倫為董氏所重時王年二十四矣及董為杭州一日因事遣王之臨安途餘杭有瞽者善摸骨相集於龍光橋在餘杭縣王因請相竟無一言王翌日自臨安而還曰已暮矣相者復在舊所王遂贖金請相相者曰旁無人乎王曰獨在斯相者乃引臂久之歎曰天下亂矣莽時之內再遇貴人言訖而去旬日後王復以東帛

至餘杭將酬之訪於鄉閭竟絕蹤跡

戊五年寇盜蜂起有朱直管曹師雄王知新等各聚黨數千剽掠於宣歙開秋九月王率本鎮兵討平之以功聞授石鏡鎮衙內都知兵馬使遷鎮海軍右職己亥六年秋七月黃巢擁眾二十萬大掠州縣淮南節度使高駢羽檄徵兵討之巢將及石鏡鎮眾纔三百人王謂董氏曰黃巢以數萬之眾踰越山谷旗鼓相遠首尾不應宜以伏兵襲之賊或少却則可遂矣巢前軍二千餘眾果崎嶇而至王率二十騎伏於草莽巢小將單騎先進王親注弩射之應弦而斃伏兵遂

起巢兵大潰王謂眾曰此術止可一舉耳大軍必至則眾寡莫敵矣宐乘勝張虛聲以懾之乃進屯八百里古地名也途次逆旅遇一老嫗而誠之曰後有兵至當言臨安兵屯八百里未幾巢兵果至具如所對賊眾相顧曰向止數騎尚不可當况八百里乎遂不犯境王又伺其後軍殺獲人馬而還歸功董氏淮南高駢聞而偉之

庚子廣明元年冬十二月黃巢犯闕僖宗入興元杭州

始建八都

臨安縣曰董昌王副之餘杭縣曰陳晟於潛縣曰吳文舉鹽官縣曰徐及新登縣曰

杜稜唐山縣曰饒京富春縣曰文禹龍泉縣曰凌文舉各聚千人以備鄉里

既而高駢召

董氏赴廣陵王亦從焉駢熟視王因顧左右曰此人他日爵祿必遠過於我時駢將大舉討巢命董氏從行王謂董氏曰竊窺高公無討賊之志苟從其行功效不立是同坐罪宐以捍衛鄉里為辭董然之告於駢駢因以禮而歸焉是月黃巢自稱大齊皇帝辛丑二年春正月僖宗幸蜀改元中和敕高駢為東西行營都統起師討巢駢竟不出兵秋八月己丑夜星大如杯椀交流如織至丁酉乃止西晉之末五星互經天縱橫無常未幾五胡之亂驗矣九月詔授董昌杭州刺史授王都知兵馬使太子賓客

王中和二年秋七月浙東觀察使彭漢宏 姓犯王諱 故號彭賊以天子西幸乃遣弟漢宥馬軍都虞候辛約率兵二萬營於西陵將圖浙西既燒魚浦劫富春兵勢甚盛董乃遣王率師禦之是月十二夜將渡江而星月皎然兵不可渡王親掬江沙吞而祝曰吾以義兵討賊天若見助願陰雲蔽月以濟我師俄而雲霧四起咫尺晦暝王大喜即先渡江竊賊號縱火砍其營精兵繼至破賊殆盡漢宥辛約走之擁入溝塹士卒大半溺死屍骸相枕冬十月漢宏又率衢婺等四州兵七萬餘人遣登高鎮將王鎮領之營於江干連營相屬

王率儒童鎮將徐靖浙江都遊奕使阮結啣枚宵濟復大破之王鎮奔諸暨王獲漢宏所署主將憲官偽敕二百餘道俘馘萬計兵甲生口稱是歸漢宏所掠民間妻女於鄉里者數百人是月詔王兼侍御史癸卯三年春三月漢宏又分兵於黃嶺巖下貞女等三鎮及山洞凡九十三所皆千餘人以圖大舉王率八都兵自富陽以趨之破黃嶺巖下及山洞三十餘所生擒貞女鎮將陽元宗巖下鎮將史弁等仍焚其兵甲夏四月漢宏自領兵屯諸暨古剝嶺至於亭山龜山之下王先攻諸暨獲糧二萬餘斛旋破古剝嶺亭

山等寨賊皆宵遁五月漢宏又遣將何蕭黃珪等率
本道排門軍營於蕭山諸暨等處王親禦之破賊一
萬餘人生擒都虞候章公直餘黨走之冬十月漢宏
又遣弟漢容與辛約巴立李萬敵等會溫處等州兵
泊白丁十餘萬眾從蕭山西陵大出戰船以謀宵濟
王自新沙由魚浦而攻之戮何蕭等遂趨蕭山是月
戊午王親與漢宏遇自午至戌破賊大眾漢宏易服
持膾刀而遁時軍中有異其狀者將擒之漢宏誑曰
我宰夫耳遂伏於亂屍之內得免次日漢宏復舉餘
黨四萬人來抗我師乘勝大敗之斬漢容辛約及招

討判官譚昇都知兵馬使巴立先鋒李萬敵仍獲漢
宏偽淮海招討使印一鈕戰艦五百艘馬四千蹄兵
甲萬計俘馘千人漢宏宵遁歸越

甲辰四年春二月婺州王鎮執刺史黃碣請降於王漢
宏聞之使其下婁貴殺鎮而代之夏四月浦陽鎮將
蔣瓌會我師攻婺州生擒婁貴而還未幾敕命中使
焦居璠爲杭越通和使俾其改過王遂班師以待之
漢宏因殺王人密徵水師於溫州刺史朱褒出戰船
習於望海以史惠施堅實韓公玟領之復圖水陸竝
進秋七月敕授王國子祭酒兼御史大夫右千牛衛

將軍冬十二月朔天子南郊改元光啓

乙光啓元年春正月僖宗發蜀三月至京師冬十月

授王檢校散騎常侍右武衛將軍十二月監軍使田

令孜進逼帝如鳳翔

丙二年春正月田令孜劫駕如寶雞二月復興元冬

十月大將朱玫立襄王為帝朱玫僭立煜為帝以是

月一日王謂董氏曰除惡務去根本不爾當為後患

願以全師討之董曰然王即日進師以諸都兵馬使

阮結守梅市監陣使錢爽守雙童邊後使駱團守平

水降將使章可周唐晟王公備等守蘭頭江海遊弈

使崔則守羊石是月辛亥王親率師自諸暨趨平水

導山路至於曹娥埭癸丑破韓公汶因與朱褒遇水

師戰淖皆焚而溺之甲寅進屯豐山梅城鎮將施堅

實執漢宏右直將張師及歸於王丙辰進拔越城漢

宏走台州辛酉戮漢宏妻母弟姪及其黨史惠史侃

都虞候蔡約於軍門十二月丙午台州刺史杜雄執

送漢宏至命斬於會稽市漢宏叱刑者曰吾廉察也

非汝輩可殺吾嘗夢手捧金錢殺我者錢公也乃請

王親刃焉漢宏兗州使院之小吏也尋為大將領本

州兵以禦黃巢寇遂殺將首劫輜重而叛

詔忠武軍討之不利復命前濠州刺史崔錯招攜之

宏遂降授宿州刺史會浙東觀察使柳瑫以賄免朝

官皆恥代之議者以漢宏降將也以降將代賊吏宜
 矣乃除之既有七州之地而復萌逆節常會客酒酣
 謂眾曰天下喪亂金刀之識烏知非僕遂撫掌大笑
 復又會於使院有羣鴉噪庭樹上因使伐木有座者
 言此樹有年矣鴉噪乃常耳願勿為怪宏曰我將斬
 白蛇豈止此樹耶遂伐之又常構別第窮極雄壯一
 日有飛帛書署其門曰漢宏是賊豈宜造此大宅宅
 之中堂懸一錦傘守衛甚謹即夕失之入皆以為任
 俠所獲及舉兵至西陵將謀渡江乃禱於江干俄有
 一矢墜其前莫知其所來宏頗惡之既敗棄其母挾
 妻而奔焉就執之日董庶人讓之宏曰成即是敗即
 非自古何有不敗之家不匹之國僕射有名將良策
 宏無之以至於此而儒童鎮將徐靖以俘掠居人戮
 此何必太讓哉既而儒童鎮將徐靖以俘掠居人戮
 之於市北關鎮將彭城孟安姓犯王諱與弟孟宿輒起
 府庫散其本部仍執廉使牌印王因饗於擊塲遂責
 之孟安即席謀王王立斬以徇時孟宿部兵屯於外

王親撫之悉有其眾越人及諸將皆推王為主王固
 讓董氏董遂權蒞於越杭人復請王代董氏時浙西
 節度使周寶承制以王權知杭州軍州事兼杭州管
 內都指揮使是月赴本郡錄其事以聞詔授王檢校

尚書

丁三年春正月帝在興元敕授王杭越管內都指揮

使上武衛大將軍充杭州刺史董昌為越州觀察使

凡國王自陪臣以下所授官爵自貞明戊寅以前制
 用詔敕皆自開道而至戊寅以後南康貢路阻絕則
 皆航海而至皆出其迎授徐審三月潤州都客司軍
 德本日月而書之他皆倣此

將彭城浩姓犯王諱逐節度使周寶出於毘陵推度支

催勘使薛朗為主仍火其城是月帝至鳳翔夏四月

六合鎮使徐約攻陷蘇州淮南高駢為其下畢施鐸

所幽乃召宣州觀察使秦彥為主五月王命東安都

將杜稜浙江都將阮結靖江都將成及率兵討薛朗

初杭州山賊朱直為亂遂募八縣鄉兵以討之因為

八都臨安董昌首之今東安浙江靖江皆其數也其

諸都地名都號首六月師次陽羨與賊將李君旺遇

大破之獲船八百餘艘秋九月秦彥殺高駢駢擁兵

用妖人自取凶滅秦彥與畢施鐸出師屢敗疑駢黨

內應遂殺之高駢之事豈非佛氏所謂輪迴果報者

乎易曰積善之家必有余慶積不善之家必有余殃

曾子曰出乎爾者反乎爾者也若高駢所得猶未足

以償數千人之怨纔足以是月詔加王檢校戶部尚

見天道好還之不差忒耳

書至日王師次呂城斬賊將丁重德屬將趙君度走

之遂進攻常州丁從實棄城宵遁從實浙西小將也

用為是郡郡人以為暴虐號為丁滅門及是奔於海

陵鎮鎮使高霸及楊行密同入海赴高駢之難從實

竟為行密之所害也冬十月周寶遂歸於王王以屬郡禮具

橐鞬迎之於郊仍舍於樟亭驛是日廬州刺史楊行

密始入淮南十一月十二日文穆王生十二月命杜

稜為常州制置使遣阮結等進攻潤州是月乙未周

寶卒寶字尚珪曾祖侍選唐滄州魯城令幽薊之亂

魯城以一邑拒寇為賊所害祖光濟左贊善大

夫依侯希逸於平盧軍為衙門將每行陣獲攻魯城

者必殺之以祭父懷義以武藝為韓皋所重累官

至工部尚書天德軍使寶即第三子也以父蔭為千

牛備身尋去求職依天平軍帥武宗三年徵方鎮有

才器者入宿衛寶因隸右神策軍出為良源鎮將有
 戎政本軍表聞授右廂都押衙馬步軍知軍事大將
 軍出涇州聚糧二十餘萬斛黃巢之亂移鎮海軍節
 度使僖宗幸蜀加授右僕射檢校司空中和二年拜
 同平章事時朝廷以丞相王鐸奉諸道兵復長安以
 寶為天下租庸副使兼管內營田使五年授特進檢
 校太保兼侍中進封本郡王至是以疾薨年七十四
 子璵嗣比唐制武選以馬上擊毬較其能否有置鐵
 鉤於毬杖以相擊寶嘗遇此選為鐵鉤所摘一目睛
 迭寶即取而吞之復擊毬遂獲頭等授涇源救賜一
 木睛以代之木睛不知何木視之亦明置水中無所
 礙真睛矣一日早起盥漱其睛墜水盆中侍姬竊笑
 寶怒曰我賭漢何足笑也遂殺之潤州衙軍以軍額
 號鎮海軍蓋宿舊也寶復置親信號決勝軍處之後
 樓使其子璵總之眾號為後樓軍其衣食糧賜數倍
 於鎮海士卒頗有怨望因恣橫於外一日會客於後
 樓即席有言其事者則殺之而薛朗與鎮海將彭浩
 友善遂以寶意示之且誠其跋下浩聞之憤曰可以
 免禍者不過反耳是夕遂率鎮海軍而叛乃推朗為
 主寶聞亂率家屬跳襪拓芙蓉門召後樓軍曰後樓

軍兒即能救我乎後樓聞之亦同叛焉寶遂奔高駢
 與寶夾江為鎮頗有嫌隙及奔駢遺書曰竊承走馬
 以及奔牛又遣送黃蘗一瓶葛粉十觔以表蘗粉之
 意寶在涇原至於金陵多會賓客歡宴終日後庭樂
 妓百餘人水陸肴饌日極豐美以撫養欠均
 以致叛亂得罪驕奢蠹其福祿而使其然乎
 戊申文德元年春正月孫儒殺秦彥畢施鐸彥等因高
 酷遂亂殺駢并殺駢子弟甥姪有一婦人臨刑戰手
 大罵曰我必訴於上帝使汝等後日舉家殺戮一如
 我今日至是果是月駕在鳳翔丙寅我師克潤州生
 擒薛朗而還王命剖心以祭周寶城浩走免王命阮
 結為制置使又命築嘉興縣城二月駕還長安大赦
 改元文德三月朔日有蝕之僖宗疾革命立壽王為
 太弟帝崩太弟即位是為昭宗詔加王檢校司空夏

四月孫儒入淮南陷揚州楊行密奔海陵復歸廬州

秋九月王命從弟鉢率兵討徐約於蘇州約盡驅州

人以守城皆文其面曰願戰南都有軍事衙推陳車

車本二名上字謂人曰南都者蓋都邑之稱杭州終

當建國乎冬十一月楊行密攻殺宣州刺史趙銓而

有其地

己龍紀元年春正月朔改元三月我師破徐約於蘇

州約奔入海中箭而死約曹州人初從黃巢攻天長

周寶子婿楊茂實為蘇州刺史約攻破之遂有王命

海昌都將沈粲權知蘇州事夏四月丁丑命築安眾

營於臨安五月甲辰潤州阮結卒

結字韜文錢塘人也杭州建入都結

亦副焉中和二年以征漢宏有功授散騎常侍光啓

三年征常州又平潤州累授戶部尚書四年充潤州

制置使尋遷刑部尚書初徐約之黨三千餘人來降

結撫之失所因散香於甘露寺輒為所叛投於江遂

成疾而卒王以其弟右驍衛將軍阮綽領其本郡仍

命成及代所任及盡誅其叛卒秋七月敕授王金紫

光祿大夫檢校司空本州防禦使冬十月敕除給事

中杜儒休為蘇州刺史以沈粲為制置使十一月帝

南郊更名睦改元大順是月宣州楊行密遣將李宥

陷我毘陵執杜稜而去初李宥攻毘陵鑿穿地道而

之寢室因執稜十二月淮南孫儒遣其下彭建封犯

於臥榻而去

王諱故帥眾陷我潤州成及奔歸

戊大順元年春正月戊子朔皇帝受冊尊號大赦夏

四月敕遣使徵兵討李克用因路遠事遂寢秋七月

常州李宥陷我姑蘇制置使沈粲害刺史杜儒休及

兄延休而奔於我王以其失備復害刺史將欲誅之

粲遂奔孫儒初沈粲之攻杜儒休儒休曰勿殺我與爾金粲延休異母兄弟也粲日殺爾金

將焉往遂殺之儒休與延休同日而死異哉是月楊行密遣將張

行周為常州制置使八月制加王吳興郡開國男閩

九月孫儒復遣城彭建封攻毘陵殺張行周而復困姑

蘇是王王命築新夾城環包氏山洎秦望山而迴凡

五十餘里皆穿林架險而版築焉王嘗親勞役徒因

自運一甓由是驂從者爭運之役徒莫不畢力冬十

一月孫儒陷姑蘇李宥奔常熟十二月孫儒歸淮南

仍以沈粲為制置使是月敕遣使高品賜官誥加王

檢校司空同平章事

亥二年春正月孫儒自淮南復入姑蘇將乘勝以圖

我王出舟師以禦之儒遂絕南顧夏四月彗星見大

赦天下秋七月城東安鎮冬十二月孫儒燒掠蘇常

遂逼宣州因圍楊行密行密遣使求救於我王出糗

糧甲兵以助之是月常州甘露鎮使陳可立據本州

王遣師平之

壬子景福元年春正月丙午朔大赦改元二月命從弟

錄為蘇州招揖使夏四月敕陞杭州為武勝軍授王

本軍防禦使六月王出師會宣州兵敗孫儒於宣城

行密斬孫儒傳首京師宣州以沈粲歸王戮之於市

而行密因有廣陵焉初楊行密軍師張某或曰李某頗善占算前一日謂行密曰明日大水亭午可獲孫儒時畏日曠赫儒兵正勝人皆

晒其言及詰旦西北有雲大如箕漸漸瀰漫俄而

兩大水暴作儒謂眾曰城中大水將及我諸營自顧

無相救也俄而水深丈餘城中知其號令乃徑出兵

邀擊儒營他皆不救因是月泉州王潮攻陷福州殺

獲儒軍師之言果驗

范暉而有其地亦作鮑姓乃陳巖之子壻也巖為福州數年而卒以暉繼之至是為王潮

所害時福州嘗有僧記之曰潮水來巖頭沒

潮水去矢口出矢口蓋言將來繼潮之人也

癸丑二年春二月楊行密以其將田頔牧宣州安仁義

牧潤州夏閏五月詔授王本軍團練使蘇杭等州觀

察處置使進封彭城郡開國侯食邑七百戶秋七月

丁巳王率十三都兵泊役徒二十餘萬眾新築羅城

自秦望山由夾城東亘江干泊錢塘湖霍山范浦凡

七十里咸通中京師有望氣者言錢塘有王者氣乃

遣侍御史許渾中使許計齋璧來瘞秦望山之腹以

厭之使迴望氣者言必不能止又郭璞撰臨安地志

云天目山前兩乳長龍飛鳳舞到錢塘海門山起橫

為案五百年生異姓王至是果驗

率十三都者八都之外有紫溪保城

龍通三泉三鎮是為十三都也

九月制授王鎮海節度浙江西道觀

察處置等使潤州刺史

先是今年三月詔以鳳翔宿衛羅德都頭李鋌授特進同

平章事領浙西差朝廷以李茂貞徹海王惡其黨將奪之權故有此授而丹陽已為淮人所有鋌不能至

所治至是命王時議當之又周寶蒞丹陽州人凡有期必曰待錢來斯之應也比蜀禪月太師休公嘗上

詩曰今日再三難更讓識辭惟道待錢來明矣

甲乾寧元年春正月乙丑朔大赦改元二月王命成

及權蘇州刺史三月制王白光祿大夫檢校司徒進

充本道營田招討鹽鐵制置發運等使夏五月敕遣

中使彭延鉅特授王開府儀同三司同中

書門下平章事六月敕遣中使賈居蟾賜王私門立

戟
乙卯二年春二月進封王開國公食邑一千戶是月威

勝軍節度使董昌僭稱皇帝建元順天國號羅平年

或曰天冊或曰天聖皆非也江東羅諫議隱撰吳越行營露布曰羅平者啓國之名順天者建元之始又

曰以將門稱天冊之樓以會府為宣室之地明矣昌以書告王其所稱云權

即羅平國位印文曰順天理國之印王得之召賓吏

以議曰董氏昔我鄉黨也今吾鄰藩也其豐功茂績

崇階厚祿又吾所以贊成也今採聽妖妄遂圖僭亂

吾以受朝廷將相當徵兵以討之然以惡跡方炳庶

或能改吾先馳書以勉之救其覆族之禍眾悉稱善
乃遣賓屬沈滂率將吏數百人移書以諫之曰與其
閉門作天子與九族百姓俱作塗炭不若開門作節
度使終身富貴無憂也及今悛悔尙可及矣昌竟不
聽王乃表聞之仍又親率兵至迎恩門望樓再拜且
諭曰大王奄有數州位兼將相非不貴矣非不富矣
一旦顛倒兵柄改易臣節自貽伊戚禍不旋踵今率
諸州兵至城下以俟大王改過苟不見聽則天子赫
怒羽林黃頭濟江而至襲大王之城非唯大王有累
卯之危實鄉黨生靈皆歸鼎鑊矣禍福之道惟大王
擇之昌於是送犒師錢二億萬仍執妖人應智王溫
室巫姬阿韓掾吏吳瑤秦昌裕至於軍門且言待罪
於天子王遂誅應智等而還復表其事時越州都指
揮使馬綽指揮使駱團出降俄而詔王討昌又敕遣
中使高品李重密來勞我師仍削奪董昌官爵
詔曰夫雷霆霜雪上天降以成物明賞飭法哲王
垂以理人是則陽春不可以獨爲歲功仁恕不可
以專爲君德威刑之作其枉斯乎朕以眇躬祇膺
大寶奉祖宗之丕訓荷天地之洪休八年於茲一
日無怠遜於志者旣求諸道逆於心者必本於情

苟懲戒之不明懼典章之斯廢威勝軍節度使隴西郡王董昌出於行伍屬遇艱難權握兵戎位崇將相器纔盈而自覆鼎必折而遂傾因憑生祠輒有狂計假陳妖異惑亂邪巫鼓譟危樓僞爲建國不思理代徒生犬吠之音欲效崇祠妄舉狐鳴之兆賴浙西節度使錢諱與諸司等皆忠誠憤激壯節堅高始以逆順之理飛章諭之而不悟次以攻伐之謀盟約脅之而不回至於率兵直以靡壘雖復假言幻惑止遏兇邪終爲閉壁偷安不使束身歸罪是其陰詐猶欲張皇魚戲鼎而雖亦可哀頌

拒轍而終爲不率天討有罪鬼得而誅其董昌在身官爵竝皆削奪仍委爾進兵攻討越州城士庶且多宥無勇敢之徒善以功名自許如有梟戮生擒董昌者授以三品正員賞錢一萬貫如先有官者超三資酬獎如是董昌威制曾助妖謀翻然改圖轉禍爲福有所自効者罪竝不問賞則與之於戲惡殺好生君人令德仗順伐逆武夫令猷鳴鼓而攻旣非獲已奮戈而起亦宜慎諸勿發勿焚無誤無失罔俾觀聽謂我黷武而勤兵也

夏四月辛卯蘇州雨雪乙巳皇考太師薨六月制授

王檢校太傅彭城郡王兼浙江東道招討制置兩浙
 鹽鐵發運等使是月王起師討董昌秋七月制授王
 起復雲麾將軍上金吾衛大將軍員外置同正員是
 月帝幸莎城旋至石門鎮八月車駕還京於是董昌
 求援於淮帥楊行密行密遣將臺蒙等困圍姑蘇以
 應昌冬十月行密又遣安仁義田頽等攻我鎮戍昌
 遣裨將陳郁鍾福率黨屯於香巖寺又遣李蕙崔溫
 屯於石候香巖石候皆地名王命武勇都知兵馬使顧全武
 馬步軍都知兵馬使王球率兵往逐之遂戮李蕙崔
 溫等未幾昌復構湖州刺史李師悅率兵四千餘人

侵我封境又遣徐淑因我嘉禾王命內衙都虞侯方
 密襲之不克更命顧全武率所部而禦之因破烏墩
 光福二砦而府城東接大江賊不得聚然沙路平漲
 賊之游兵得以來往王謂全武等曰賊若有我江壩
 襟帶甌越則不可當也汝善禦之十一月衢州刺史
 陳儒卒弟岌嗣時顧全武遣偏將孟寶蔣璠率兵屯
 於西陵是月敕王依前起復檢校太傅兼侍中加食
 邑一千戶是歲終郊封胥山伍子胥為惠應侯封胥山祠
不詳詔命日月羅代集有碑云三年閏正月則知詔
 下之明年正月為碑今按長曆乾寧三年今甘崇耳
 丙辰三年春正月敕授鎮海軍水陸都指揮使費州刺

史高彥諸軍應援指揮使夷州刺史沈夏竝檢校司
空是月安仁義出戰船從湖州將渡江以應董昌王
命武勇都指揮使許再思等禦之仁義竟不敢渡然
沙路之患未弭乃祭江海而禱胥山祠一夕驚濤沙
路悉毀江壩一隅無所患矣昌又遣將徐珣李元賓
等據肅清四樸九鄉之地王命顧全武王球擊之徐
珣等來降昌又遣將湯舊領兵守石城袁邠領兵守
永寧時昌鎮遏使朱威與賀蘭風招揖使孫仲殷等
竝投款於王且爲越軍所襲朱威等由海道而至二
月王命顧全武許再思自西陵趨石城與湯舊遇遂

破石城

去越城僅三十里

生擒其黨六百餘人湯舊等走還

昌不能援三月我師復攻餘姚袁邠因大戰賊黨逃
溺者相半而明州刺史黃晟遣指揮使梁從暉率兵
來應我師袁邠堅壁自固昌益兵以救之顧全武遣
武勇隊主彭彥章姓因犯王諱故號焉又截其衝要生擒賊將
徐宣等斬首二百餘級昌又遣暨陽鎮將陳郁自南
臻了口至於富陽漁浦等處屯聚王命王球等擊之
仍遣婺州兵及諸鎮兵以應之時陳郁率其黨千餘
人來降夏四月我師執袁邠及偏將潘薦等凡二千
餘人王以朱威復爲永寧鎮使是月顧全武進圍越

城而楚武王馬某始有湖湘之地

王馬姓名犯宣祖廟諱故以益易之

五月辛巳董昌親閱戰於五雲門仍懸玉帛以誘

我師顧全武許再思等奮擊之其黨大敗昌愕視而

退至是始懼自去其帝號

初城中有言王師雄壯強盛者輒怒而斬之有言王

師兵疲而糧絕者則喜而賞之於是親閱我師奮擊始大懼而退

次日王命分兵進

攻以顧全武充諸軍都虞候東面都知兵馬使與指

揮使孟寶等攻五雲門王球充右副指揮使與蔣璠

等攻亭山及甲光門陳章充右副指揮使與錢顏攻

關子門許再思充馬軍都虞候北面都知兵馬使攻

昌安門駱團充四面都指揮使攻迎恩門是月癸未

越城將拔而臺蒙等陷我姑蘇刺史成及被執王乃

召全武議將分兵西陵以備北寇全武上言曰賊之

根本繫於甌越豈以失一姑蘇而遂追天討願先拔

越城然後復茂苑未遲王從之乙未董昌猶據牙城

拒之王給昌曰奉詔令大王致仕歸臨安昌乃送牌

印而出顧全武遣上武勇都監使吳璋執昌至而斬

之越州平王命散府庫金帛以賞將士開倉廩以賑

貧乏又斬偽宰相李邈蔣環等十餘人以下脅從者

悉宥之

董昌臨安人也始為土團軍破山賊有功為石鏡鎮將尋遷杭州平彭城漢宏復除越州

其始在餘杭洎領越州頗有廉儉之度累授開府儀同三司檢校太尉同平章事封隴西郡王時屬京師

喪亂文籍多亡越州有裴氏書樓昌悉取其書以貢
 授諸道採訪圖籍使既而恣為淫虐凡按罪人無輕
 重枉直必命毆子使對擲勝者宥之否則殺之而
 案牘不復參決但一概誅戮而越州有白樓門外
 即殺戮之所地為之般守門者嘗夜聞鬼哭凡軍中
 制度多所改易隸中軍者衣黃布背印威儀二字隸
 外軍者衣白布字號如之凡所器玩無小大皆號以
 元字軍中文其臂者亦如之識者以為元者錢之文
 也皆當歸錢氏昌建生祠諸郡置土馬有誑馬嘶發
 汗者畢被賞又立將吏木偶悉用長釘以釘其足曰
 更三二百年免有顛踣末年盈滿遂圖僭亂故妖人
 應智等竟以幻惑進愚民俗吏致龜魚符印者日以
 百數又集無賴之徒皆斷腕傍耳號曰感恩都以備
 腹心及議立國號有客使倪德儒語昌曰中和辰巳
 閒越中嘗有聖經云有羅平鳥主越人禍福敬則福
 慢則禍於是民間悉圖其形以禱之今觀大王署名
 與當時鳥狀相類乃出圖示昌昌欣然遂以為號僭
 立之際年月日時皆用卯從妖言也或云古讖書云
 江東岸上重日生日昌以名應之故悉用卯以符日出
 之義也初昌議立問會稽令吳臻錄曰大王不為真

諸侯以傳子孫欲為假天子以取滅亡也昌族誅之
 山陰令張遂曰浙東雖領六州大王稱帝彼不從徒
 守孤城為天下笑昌又殺之節度副史黃碣惡其惑
 亂屢諫碣家奴有致印於昌者碣將殺奴遂投昌
 匿之碣乃密致書於管權官李滔有順天將期一統
 其如之何以愚計之誠豈為稍耶之句有竊其書送
 昌昌集召議之碣曰今王室雖衰天人未厭大王興
 於畎畝受朝廷厚恩位兼將相富貴極矣柰何一旦
 忽為滅族之計昌詬之曰爾賊負我好聖明時三公
 不能待先求死也遂斬碣首投諸廁中仍族誅之而
 李滔亦遇害自王師攻討而遷延未克者以其姪真
 小得志耳俄而真與裨將刺羽不和譖於昌而殺之
 嶽由是解體蓋作是月乃雨自前年仲冬不雨至於
 亂天實所廢也乃雨七月李茂貞犯闕帝幸華州八月敕授王
 今平之秋七月李茂貞犯闕帝幸華州八月敕授王
 乃雨也秋七月李茂貞犯闕帝幸華州八月敕授王
 檢校太尉兼中書令加食邑一千戶實封一百戶賞
 去偽之功也仍遣供奉官甯全道賜王旌節又遣中

使韓彝範來宣諭將授王越州王固讓遂除宰相王

搏亦作溥出鎮越州搏以王有大勳宜當所授復固請

辭冬十月敕改越州威勝軍為鎮東軍授王領鎮海

鎮東等軍節度使十一月戊子湖州刺史李師悅卒

子繼徽嗣師悅要節制於朝廷授中國軍節度使

使臣未及境師悅已寢疾使人覘之回報

攻東陽刺史王壇堅壁自固

丁巳四年春正月帝在華州是月王命行軍司馬杜稜

都監使吳璋率兵救東陽安仁義復攻睦州一夕大

風雨賊眾驚擾而遁夏四月命顧全武與王弟鎮并

武勝軍都指揮使沈夏陳章高遇許再思等率兵自

海道以救嘉禾時諸將皆欲緩進惟全武請倍道兼

行王從之一日師次嘉禾城中莫知所之遽見我旗

號皆大悅賊亦謂之神是日遂內外夾擊擒賊將李

宗禮偏將顧金等二十餘人俘馘不可勝計乘勝大

破賊寨十有八所又擒賊將魏約張宣楊燔閣建等

士卒三千餘人嘉禾平全武等又乘勝逐田頽於驛

亭埭頽由吳興而遁於時大水我師逐之斬馘沉溺

者僅于十里

初安仁義田頽之攻我也乃請淮帥楊

行密率兵親至攜一僧袒肩者來視王

城僧曰此腰鼓城也擊之終不可得又聞城中鼓角

之聲曰錢氏子孫皆當貴盛未可圖也行密乃先歸

而安仁義田顧駐屯於北郊復有電火焚六月己酉

穎營震折威鎗由是俱敗豈非天使然也先是救命到時王謂眾曰淮

王如東府受鎮東節鉞先未殄吾不敢奉命至是方

行秋七月庚寅王至自東府命顧全武率師復姑蘇

八月我師屯崑山既而敕王起復加食邑一千戶又

遣中使焦楚鏗齎鐵券至

券文曰維乾寧四年歲次丁巳八月甲辰朔四日

丁未皇帝若曰咨爾鎮海鎮東等軍節度浙江東

西等道觀察處置營田招討等使兼兩浙鹽鐵制

置發運等使開府儀同三司檢校太尉兼中書令

使持節潤越等州刺史上柱國彭城郡王食邑五

千戶實封一百戶錢鏐朕聞銘鄧隲之勳言垂漢

典載孔悝之德事美魯經則知褒德策勳古今一

致頃者董昌僭偽為昏鏡水狂謀惡蹟漸染齊人

而爾披攘兇渠盪定江表忠以衛社稷惠以福生

靈其機也氛祲清其化也疲羸泰拯於越於塗炭

之上師無私焉保餘杭於金湯之固政有經矣志

獎王室績冠侯藩溢於旂常流於丹素雖鍾繇刊

五熟之釜竇憲勒燕然之山未足顯功抑有異數

是用錫其金板申以誓詞長河有似帶之期泰華

有如拳之日惟我念功之旨永將延祚子孫使卿

有

長襲寵榮克保富貴卿恕九死子孫三死或犯常刑有司不得加責承我信誓往惟欽哉宜赴史館頒示天下

是月敕封胥山惠應侯為吳安王

景福二年始作羅城而江濤勢激版

築不能就王因禱之而沙漲一十五里餘功乃成就故有惠應之請前年安仁義以游兵往復禱之一夕驚濤沙路盡毀至是九月湖州刺史李繼徽以州附感其靈貺請而封之

淮南牙將沈攸拒之繼徽遂出奔是月乙未王親巡

吳興收繼徽家屬凡二百餘人而還湖州平王命海

昌鎮將高彥為湖州制置使

李繼徽亦作彥徽父師悅乃徐州馬步院之小

史也屬王仙芝作亂遂投行伍後以遣獻黃巢首級以功授是郡師悅能書長於斷讞州有十五都頭其

丁俱數千人師悅撫之盡得其所時朝廷命將代師悅召諸校議之咸曰但慮君侯厭小郡耳不爾則苟有代人斷不奉詔會進士顧雲旅遊於雲乃請雲草奏論之雲表略云觀龍綸而髣髴猶鳳篆而依稀因不復代矣師悅在任置舟楫樹倉廩以圖割據董昌僭為師悅率兵食以應之至是繼徽復以攜貳而敗焉初繼徽將納淮人也沈攸以逆順之理論之其眾因誓曰附李氏者居西附沈氏者居東而居東者十得其九繼徽於冬十月淮人以臺蒙守姑蘇代朱黨是惶惑而遁也

也十一月己卯台州刺史杜雄卒

雄台州楊梅鎮人也初與朱黨婁文

俱為草寇婁文以雄為副文害刺史羅虬遂侵漢宏不利因降漢宏署婁文知明州事以杜雄知台州後漢宏敗率其下六百餘人奔雄使偏將方師立授漢宏於驛亭其黨皆醉遂執漢宏歸越以功董昌授雄為德化軍使至是而疾卒

戊午五年春正月帝在華州改元光化是月我師救蘇

州生擒淮將李近思斬首一千餘級又斬其將梁琮張顛等而楊行密復遣將李簡率兵五千餘眾屯於無錫我師復攻之獲其偏將陳益等而還餘皆走之

是月王以越州指揮使駱團為台州制置使二月敕移鎮海軍於杭州為治所從王請也又授都押衙董

名犯太祖諱土一字等恩命有差秋七月敕授王檢校太師賜

定亂安國功臣八月車駕還京九月婺州刺史王壇遣將攻東陽王命使諭之息民故也冬十月王遣顧

全武率師克蘇州臺蒙李德誠等皆宵遁其下秦裴

因力屈而降蘇州平初遣顧全武等攻蘇州淮將刺史臺蒙等皆棄城宵遁獨秦裴

守崑山不下全武攻之裴屢出戰復斬侮全武全武怒益兵引水灌城城壞乃出降王曰爾軍弱如此何敢久為旅拒裴曰裴義不負揚公今力屈而降耳王善其言而全武亦請宥之王從其請而遂宥之

以嘉興都將曹圭權蘇州制置使尋命為本州刺史

是月敕王兼兩浙安撫使加食邑一千戶實封一百

戶閏十月婺州王壇抗命王遣師伐之而衢州刺史

陳岌貳於我王復遣顧全武等討之十一月成及至

自淮南王亦以魏約等歸淮以報之

己未光化二年春正月我師大敗陳岌黨於龍邱二月

敕遣高品周道安改王本縣石鏡鄉為廣義鄉臨水

里為勳貴里所居安眾營為衣錦營仍賜兩浙行軍

司馬杜稜以下一百二十人竝號贊忠去偽功臣三月
 月婺州王壇求救於淮南夏四月敕陞杭州為大都
 督府是月淮帥遣將康儒等來應東陽王命副指揮
 使方密羅歇等濟師於婺州及蘭谿義烏等縣秋七
 月淮人有使入衢州者為我師殺之仍獲陳岌所送
 楊氏地圖州印以歸

庚申三年春正月淮將康儒徐從皋等復攻婺州王遣
 從弟錄率師討之三月我師大敗賊徒於軒渚遂絕
 其糧康儒等由清溪而遁夏五月敕遣中使王金峯
 齎詔封王為南康王加食邑一千戶實封一百戶王

表陳讓秋八月敕授王行軍司馬杜稜檢校太子太
 保是月庚申龍鬪於浙江因過於郭郭壤廬舍或吸
 居人浮空而去數里方墮亦有死者九月王壇奔宣

城壇本孫儒隊將儒敗率其黨三千奔睦州陳晟晟
 頗疑之處於外城未幾壇將降黨於三河鎮將陳
 嚴攻婺州刺史蔣環奔會稽壇遂有其地至是而壇奔宣城矣是月辛卯王親巡婺

州命浙西營田副使沈夏權婺州刺史壬辰王至東
 陽而東陽鎮將王永伏誅永東陽人也莊鎮治城壁
 置鼓角粧樓舞榭棗棟相

接又采妖妄立石瑞亭將窺本郡及王壇攻之王以
 前年婺民為安仁義所撓王故遣使諭之壇罷兵將
 追永歸於府城而壇不從命故伐之事是月甲午王

平令責永以不敬故斬之以謝百姓也
 復巡衢州陳岌降王以岌為浙東安撫副使命顧全

武權知衢州事

炭兄儒木黃巢之黨尋降朝廷授以

直指衙門而無人無預知者且誠其下曰我自棄他

郡州人無負我有殺掠者斬由是市不易肆既而徑

趨衢州知州元泰迎於郊儒詰之曰元宗御容安在

泰泣曰使君不見容矣時信安有元宗銅容泰毀之

故以是為責遂斬之而自據焉凡在信安十年頗有

惠愛每秋主司請納稼儒必至城南綠野亭觀其刈

穫始使輸之又嘗見吏於倉所輒振衣以避糠粃儒

怒而罰之其所為皆類此南海節度使彭崇龜道由

信安見其品裁乃撫之曰此賊有士人之風儒亦欣

然而謝之及儒病時炭入省之因顧炭曰汝非偵我

耶今汝仁弱其如諸校何乃召列校豪強者十餘人

入臥內皆斬之遂以郡付炭王壇之叛炭寔同其惡

至是降而冬十月敕遣中使取王形圖於凌煙閣王

宥之也

命寫容以進十一月庚寅中尉彭季述姓犯王諱與

王仲先樞密王彥範等幽昭宗於問安宮立德王裕

為帝以昭宗為太上皇敕遣使進王為東安王王不

受命是月己酉葬皇考太師於安國縣錦北鄉或云

鄉清風里初太師薨因有淮師葬是以緩按羅氏後

集太師誌銘曰昔歲乙卯令辰己酉十一

月也今以長厯推之十月二十

五日乙酉葬太師未知孰是

辛酉天復元年春正月昭宗反正大赦改元出太子裕

復為德王而彭季述等皆伏誅是月敕遣供奉官吐

突令鐸來宣諭仍賜國信二月王親巡衣錦營大會

故老賓客山林樹木皆覆以錦幄表衣錦之榮也命

指揮使陳章為衢州制置使夏四月丁丑王親巡東

府五月敕授王守侍中進封彭城王加食邑一千戶

實封一百戶仍陞王所居衣錦營為衣錦城封石鏡

山為衣錦山大官山為功臣山秋八月敕授邵州刺

史王子文穆王禮部尚書遙領邵州刺史九月王以

衢州制置使陳章為本州刺史是月壬子皇妣秦國

太夫人水邱氏薨冬十月淮將李神福等寇衣錦城

王命顧全武方密率師禦之全武等為賊所執楊行密遣

李神福等率兵欲圖杭州全武列八寨以拒之神福詭言還師其所獲杭俘走還者皆不追至暮遣羸兵先行而伏兵青山全武不知其詭奮勇追之伏兵大發遂被執王聞之驚曰喪我良將也既而神福欲歸又恐為王所邀乃遣人守衛王祖考邱權又令全武通家信王遣使犒之神福受其犒賂而還十一月駕狩於鳳翔王聞之悲泣乃遣使奔問帝嘉之賜

王御服夾襖子一副仍降御劄於衣襟焉十二月淮

人以師老糧乏求成而還是月敕王起復雲麾將軍

上金吾衛大將軍員外置同正員時王以衣錦城被

寇命元同先生閻邱方遠建下元金籙醮於東府龍

瑞宮其夕大雪惟醮壇之上星斗燦然殿宇無所沾

灑又有鑑湖宿釣者聞車馬之聲甚眾復有一黑虎

蹲於宮門外醮罷乃去鑑湖昔賀知章所居者一名賀湖因犯僖宗廟諱今以唐

祕書此湖故名易之也

壬二年春正月帝在鳳翔三月朔日有蝕之是月癸

丑至乙卯三日浙右大雪盈丈雪氣如煙而味苦夏

四月淮人以顧全武方密歸我王亦以秦裴報之裴

光化時蘇州降將也五月制加王食邑一千戶實封一百戶五

月望日敕封王為越王又加食邑一千戶實封一百

戶是月庚戌温州刺史朱褒卒兄敖代之褒永嘉人也兄誕始

為本州通事官屬寇亂兄弟皆聚兵禦以功遂攝司

馬及副使胡燔卒乃自據焉褒處兄弟性頗強悖一

口輒收兄誕印綬以州屬彪漢宏署褒以知州事褒

耳下有一赤點每怒發則點移至口怒解如故誕廳

吏嘗忤褒褒將殺之其母力救對曰比求郡蓋欲殺

此輩耳卒不聽漢宏之亂褒率黨助之尋以同姓結

援於梁太祖奏授本州刺史充靜海軍使褒善屬詩

文亦好禮士但動不量力故不及世而家滅亡矣

秋七月王親巡衣錦城治溝洫八月丙戌將還府城

親饗將校武勇都指揮使徐綰即席將謀不利惶懼

辭以疾王惡之即日命綰率所部先還次日王發自

衣錦城徐綰率兵已及府城焚掠郭郭左武勇都指

揮使許再思以兵迎綰同叛將及內城王子傳瑛亦

元與三城都指揮使馬綽牙將陳為等發懸門以禦

之王次龍泉有馳來告叛者王遂疾行時北郭城門

牙將潘長與徐綰遇斬首二百餘級綰退營於龍興

寺王微服至德勝門牙將周肅遣偏將鍾審以舟迎

王王遂沿江至內城東北登城而入城中莫有知者

北門直更卒憑鼓而寐王親斬之眾皆驚悟隨命都

監使吳璋三城指揮使馬綽守北門內城指揮使王

吳越傳 卷一
榮武安都指揮使杜建徽守南門又命指揮使顧全武率兵衛屯東府全武上言曰東府不足往當詣邗溝何者縮勢急必召田頔頔來淮南即興師矣宜早圖之杜建徽言曰楊氏嘗由王脫孫儒之難彼丈夫者豈不能報王耶請以難告王從之命全武行全武曰獨行事必不濟請擇諸公子王曰我嘗欲以元璪聘於楊氏汝當輔而行焉全武遂與同往矣湖州刺史高彥遣其子渭來赴難渭趨靈隱山而至為賊伏兵所害命渭所部營於城南高彥之聞難也亟遣子渭行渭曰今日不利彥日赴難之急何以吉辰耶遂促渭行渭不敢抗命遂率所部趨靈隱山而來至是果敗也九月徐

縮果召田頔於宣城頔先遣客吏何饒來致意曰相公請大王東之越城虛府署以相待所貴者兵不血刃耳王復曰軍中叛亂何方無之爾相公不嘗為人長乎反助其逆須徑來何用肆言也既而頔至泊於北門以旗鼓自蔽王登城將與之語俾開旗頔不之荅王注弩中其執旗者頔見王城中大鼓譟懼退還營遷逼於西北隅今清波門是也乃使其黨據營以辱王亦注弩斃之頔伺夜復攻西北隅梯撞畢集城中矢石如雨賊墜溝洫者不可勝計頔遂拔營而退十一月頔復具舟楫將渡江絕西陵王命副指揮使盛造朱

郁大破之俄而楊行密遣使召頽曰爾不還師我當以宣城授他人矣時行密使至頽營王城中莫有知其意者王曰田頽悖而無機倘得密意必明言其可否王乃使人往覘之頽迎行密來使於半道紅半道紅在北郊舊植桃花竝轡而行果與言及罷兵之事覘者迴以其言聞皆如土所料也既而頽率徐縮許再思歸宣城王命致犒師錢一百億以送之頽慮為我師所逐遂委質而去初王行至龍泉開變召李咸占之曰大王霸業方永但分野小災耳請勿為慮不然大正當有疾王曰豈我有疾豈害百姓耶王又召葉簡筮之曰賊無如我何王曰淮人將同惡乎簡曰淮人不來宣城當濟賊季冬方敗而宣城亦當敗於明年今不足慮如期皆驗也而武勇

郡指揮使徐縮本孫儒之黨來降乾寧中王以守禦功因備心膂前年錦城之役不用命王頗惡之及是始治溝洫而遂叛焉是月溫州裨將丁章逐刺史朱敖敖奔燕諸丁章遂據是郡

癸亥三年春正月己巳帝還京師夏四月溫州丁章為木工李彥斧殺之裨將張惠據溫州是月城婺州秋七月睦州刺史陳珣貳於我仍率黨攻婺州蘭溪縣王遣指揮方永珍等率師討平之九月宣城田頽安仁義俱叛於淮而淮帥楊行密請師於我王命方永珍率師至京口又命從弟鎰率兵次宛陵以應行密師又命指揮使楊習代方永珍於睦州冬十月我師

與淮人生擒安仁義於潤州歸淮帥而斬之田頔死於陣其母奉文穆王歸焉

甲子四年春正月帝發長安三月敕遣衛尉卿許渾來

宣諭仍賜國信是月王子元璪與所聘楊氏至自淮南夏四月帝至洛陽大赦改元天祐敕遣給事中鄭

祈刑部員外郎楊永休亦作永承進封王為吳王加食邑

二千戶實封二百戶秋八月昭宗崩太子即位敕遣

使來宣告王素服舉哀於軍門是月淮人檻送徐綰

歸我王命剖心以祭高涓冬十月朔日有蝕之是月

癸酉大雪平地丈除

乙丑天祐二年春正月制授文穆王等官爵是月淮將

閻暉等來據新安王命從弟鎰與指揮使顧全武等

禦之我師不利鎰等被執於賊三月廣帥彭城隱始有

南海而衢州制置使陳章亦貳於我夏四月陳章會

睦州兵及淮將陶雅等同攻東陽王命弟鏢帥師討

之秋八月處州刺史盧約弟佶寇永嘉張惠奔蕪諸

王命方永珍濟師於東陽會師討賊九月陳章陷東

陽執刺史沈夏送於淮南夏海鹽人也徐及為監鎮與高彥隸其中及亦入都

之一號海昌者也王副董庶人討虜漢宏於越州徐及遣夏與高彥率本部會我師王見之甚悅延入臥內謂曰吾東討之師已眾渡江之役無勞爾輩但徐及平素強梁終非我所蓄以我東討或為後患汝還

掃葉山房

本營為我殺之皆當以列郡牧汝然吾非誨人為逆
 但境上苦於干戈不仁者當盡除之息生豨耳汝
 等當識我意夏等再拜聽命王厚遣之既回告及曰
 董公與錢公以兵討賊聞將軍以所部見助喜動於
 色然以東北為慮設有狗鼠偷竊復勞後顧夏等實
 託將軍以為後據及有軍師竊視夏等謂及曰二校
 至自錢塘皆有反文在軍面將軍宜備之及不聽夏
 遂與其下謀之一夕竊發及死其下遂分而夏性兇
 暴不即我歸乃以所得眾七千餘人聚於臨平山下
 擇幼弱者盡殺之惟畱三千餘人徑往嘉興劫吳公
 約同入海為剽公約不從將殺之乃叩頭曰惟吾兄
 之命遂與俱往未幾夏以公約庸懦因放其歸夏所
 圖無成始復歸王王亦優容之累從征伐歷奏職官
 領遙郡至任果以殺戮為事左右指令小不稱意即
 加屠害王頗惡之夏一日復構私第於北郭制度雄
 壯侷於公府今北市酒家樓俱夏之第也其長子有
 過輒手刃之王以其噬子滋不悅出為東陽淮將陶
 雅以兵攻其郡王不急救遂為淮人所執尋遇害

陳章自稱葵衢二州刺史復分兵與淮將許野鶴等

犯我暨陽

野鶴之名或云許再思軍中以其多語故號之而與徐綰同惡者乃諸萬成慕野鶴

故號其名焉淮南嘗致書於王曰願事書

中其萬成之名又非許再思也是其驗矣王命楊習

逐之

一作廬

章兵大敗習遂攻東陽冬十月有獸入吳

興一角麟趾十一月王命建功臣堂於府門之西樹

碑紀功仍列賓寮將校賜功臣名氏於碑陰凡五百

人是月楊行密殂子渥嗣十二月睦州刺史陳詢奔

淮南

詢即晟之弟餘杭人也八都建稱清平鎮將因

八載而卒子紹權嗣詢黜紹權而自立懼非王命頗

不自安屬徐許之亂乃通田頴頴敗詢益懼及王命

遂不聽命而叛至是而奔丙寅三年春正月淮將陶雅率其黨自睦州歸歙是月

王親巡睦州時宣州觀察使王茂章為淮人所圖因

奔於王王以為鎮東軍節度副使二月辛卯王至睦

州陳章退保衢州婺州平是月丁酉元同先生閻邱

方遠卒方遠其先齊人嬰之後也父聞不仕以文學

尋傳法錄於天台玉霄宮葉藏質方遠雅好儒學每

披卷必曰葛稚川陶隱居俱吾之師友也銓太平經

為十三篇景福庚戌歲始居餘杭大條洞初入謁王

談莊老之義遂巡而罷退而嘆曰彼英雄也是不宐

與談元虛之道乎翊日入謁遂陳春秋因延之盡日

由是王厚加禮遇重建天柱宮俾以居之王奏請賜

紫又敕賜號元同先生一日王於城南樓命方遠圖

形前一夕王夢方遠駕鶴至由是王益奇之江東羅

隱每就方遠授子書方遠必瞑目而授餘無他論門

人夏隱言謂方遠曰羅記室上令公容先生何不與

之語方遠曰隱才高性下吾非授書不欲及他事而

隱亦盡師之禮是日乃降聖節前一日王使人以香

花至方遠受訖乃入齋中作控鶴坐怡然而一日王

逝復有異香滿室王以夏隱言繼其住持也

命方永珍楊習等進攻衢州三月命浙西營田副使

馬綽權睦州刺史夏四月朔日有蝕之洪帥南平王

鍾傳殂子匡時嗣六月淮人陷洪州虜鍾氏而歸秋

八月衢州陳章導淮將周本呂師造等入其境為我

師所逐遂奔淮南章本孫儒之黨尋降於王以從征

本郡王親餞於江干徐縮作亂越州客軍張洪等疑

懼乃與其黨三百餘人奔章章納之又屬丁章叛於

永嘉而宣州田頴使其下威滔將招之章因假道而

遣王聞之乃密使衢州羅城指揮使葉讓殺之事洩

章遂殺讓而叛初王命章城衢州工畢以圖獻王王

視西門樟樹謂左右曰此樹不入城陳章當非我所

蓄也至九月周本等率其黨歸信州王命方永珍為

是果驗

衢州制置使是月敕遣右散騎常侍王矩司勳郎中

裴均授王吳王冊禮冬十一月乙丑湖州刺史高彥

卒子灋嗣彥海鹽人也初與沈夏同受王密旨殺除

功効及湖州李彥徽棄郡奔淮南王親巡吳興其將

沈攸等皆以己功有收守之舉王遂題詩一章於嬰

蘭堂在湖州東南溪次末云須將一片地付與有心

人眾亦不測王將登舟始言曰我以此郡付汝宜善

撫之彥性淳厚居十一載政頗簡便累奏授職官遙

領費州刺史尋至今任將終有道場山僧如訥訥口

能容拳垂手過膝是乃異僧及入州城彥是月敕命

以師事之一日彥與之語訣別未幾而卒

王本道建三代師廟閏十二月王命弟鏐為婺州制

置使

丁卯四年春三月敕升衣錦城為安國衣錦軍王命文

穆王伐溫州夏四月戊午克溫州斬盧佶而還王命

都監使吳璋為溫州制置使文穆王復討處州是月

梁太祖受唐禪大赦改元開平奉唐帝為濟陰王敕

遣上金吾衛將軍石彥辭刑部郎中薛昭序來宣諭

初梁室受禪有勸王拒之王笑曰古人有言屈身

於陛下是其略也吾豈失為孫仲謀耶遂受之五

月處州盧約納款於我王以為浙江安撫副使命指

揮使俞浩為處州制置使是月敕遣金吾衛大將軍

安崇隱進封王為吳越王增食邑二千戶實封三百

戶仍賜號啓聖匡運同德功臣

初節度判官羅隱勸

王舉兵討梁曰總無

成功猶可退保杭越自為東帝奈何交臂事賊王以

隱不遇於唐有怨心其言雖不能用心甚義之王不

行六月敕遣中使來宣諭秋七月敕賜王管內刺史
 竝授官爵仍賜母妻封邑八月敕授王兼淮南節度
 揚州大都督淮南四面招討制置使九月詔封衣錦
 軍神祠號崇福侯又賜道士鄭章號名元章又賜號
 貞一太師夏隱言賜紫竝從王請也是月蜀帥王建
 稱帝國號武成冬十月敕授文穆王金紫光祿大夫
 十二_月淮南人攻信州刺史危仔昌來求救於我王遣
 師援之

戊辰開平二年春正月敕改臨安縣為安國縣廣義鄉
 為衣錦鄉夏五月淮南都將張顥殺其帥楊渥將自

立為畱後逾旬大將徐溫復殺顥立楊渥弟隆演為
 帥六月制授王檢校太師守中書令增食邑一千戶
 實封一百戶秋八月敕改杭州唐山縣為吳昌縣台
 州唐興縣為天台縣是月又敕陞杭越等州為大都
 督府王送宣州王茂章入京師茂章更名景仁避廟諱也九月制
 授鎮東軍節度副使成及為保大軍節度使同平章
 事副使餘如故未幾淮南人困圍我姑蘇王命從弟鋸
 率兵討之

乙巳三年春正月梁帝遷都洛陽祀南郊大赦二月朔
 日有蝕之敕選王子兩浙副使傅瑛為駙馬都尉夏

四月制授王守太保增食邑二千戶實封二百戶是
月王命弟鏢江海遊奕都虞候何逢司馬福等率師
救姑蘇內外夾攻生擒淮將何朗閻邱直等凡三千
餘人獲兵甲生口三十萬戰船二百餘艘陳章周本
呂師造等夜遁五月甲寅王親巡姑蘇是月丁巳明
州刺史黃晟卒晟明州鄞縣人也初應募於望海鎮
鎮中立表以選其魁梧者晟以倭陋
不中選乃隸鎮都虞候林膺而晟性強幹膺甚德之
後潛還本鄉募眾據平嘉球時權知州事楊俱署晟
為平嘉浦將有眾千餘人初城漢宏以台州賊婁文
知明州事文為楊俱所敗其黨杜宗自豳海鎮鄉民
據奉化晟自平嘉球以所部擊之執杜宗等不殺盡
驅之使還台州獲其粟帛悉屬於本道遂為奉化鎮
將飲飛都知兵馬使及餘姚鎮將相嘉侵越州董庶
人禦之不利而刺史鍾季文乃遣晟領兵攻相嘉擒

殺之董庶人奏授晟左散騎常侍充浙東道東西副
指揮使鍾季文卒遂有本部晟頗尚禮士辟前進士
陳鼎羊紹素以為門賓江東儒學多依之悉加優
待仍築其居號曰措大營及董庶人僭偽晟亦移書
諭之及王師舉晟亦率眾應之在任十有八年遺疏
不請其子為嗣凡府庫所畜必題曰送使其忠順如
此
辛酉王自姑蘇復如東府辛巳復巡明州因城望
海鎮命子元琳為明州制置使信州危仔昌為其下
應淮人而叛遂奔於我王以為淮南節度副使六月
壬寅王發明州救遣刑部尚書姚洎禮部員外郎羅
衮授王吳越王冊禮戊申至自東府王之巡句章也
行次餘姚丈亭
鎮舟奏巨石不能進既而大雨震電有二龍負王舩
之下鎮遏使翁元軻拽舟而進二龍自舩而升焉此
其異常也耶
秋閏八月制授王守太尉加實封二百戶

吳越傳 卷一
制曰集非常之事必有挺非常之才建第一之功
必有居第一之位朕膺圖受命負展開階未嘗以
真太尉之官輕於擬議大司之職易於簡求蓋由
其爵尊其任重不有英佐孰當異恩啓聖匡運同
德功臣淮南鎮海鎮東等軍節度使淮南浙江東
西等道管內觀察處置充淮南四面都統營田安
撫兼兩浙鹽鐵制置發運等使開府儀同三司檢
校太師兼中書令杭越等州大都督府長史上柱
國吳越王食邑一萬五千戶實封一千戶錢諱海
嶽騰英星雲誕秀契君臣咸一之德有文武兼備

之才宜慈惠和忠正廉毅敦詩閱禮樹百行於藩
籬去暴除奸敵萬人於幃幄弼予興運明乃嘉謨
頃屬淮夷不賓王化自爾益封吳會兼鎮廣陵追
擒每盡於隻輪覆溺速收其巨艦復聞奸宄屢擾
巡封謂天蓋高若水可恃爾又橫戈憤悻獨力支
梧妙運神機大殲戎醜元雲陣起雄風驅下瀨之
師白露圍開沴氣散常州之化再安生聚重復土
疆薛公之三刺咸明漢主之一奇斯在况早攀鱗
翼備見肺腸同德同心二紀密參於締構惟忠惟
孝四方咸則其儀刑苟非劇恩何以加賞是用鏤

於彝鼎冊以輅車擬呂望之尊崇正列侯之貴重
仍加真食復寵兼官式是獎酬且旌忠烈於戲進
以正大易所以經邦慎厥終格言用之居位勉思
遵守克荷寵靈服予訓辭錫爾繁祉可守太尉加
實封二百戶餘竝如故

是月敕置蘇州吳江縣明州靖安縣今定海縣是也從王請


也冬十月湖州刺史高豐貳於我遣其黨焚燒義和

臨平等鎮王命弟鏢率師討之十一月乙酉發運使

羅隱卒隱字昭諫新登縣人也祖知微福唐縣令父

羅隱卒 隱字昭諫新登縣人也祖知微福唐縣令父 脩古應開元禮隱本名橫凡十上不中第遂 更名初從事湖南歷淮潤皆不得意乃歸新登及來 謁王懼不納遂以所為夏口詩標於卷末云一箇爾

衡容不得思量黃祖慢英雄之句王覽之大笑因加
殊遇復命簡書辟之日仲宣遠託婁荆州都緣亂世
夫子辟為魯司寇只為故鄉隱曰是不可去矣簡辭
孔目官章魯風之辭也王初授鎮海節度時命沈崧
草謝表盛言浙西繁富成以隱隱曰今浙西兵火
之餘日不暇給今朝廷執政方切於賄賂此表入執
政豈無意於要求耶乃請更之其略云天寒而麋鹿
常遊日暮而牛羊不下朝廷見之曰此羅隱辭也及
為賀昭宗更名表曰上則虞舜之全文右則姬昌之
半字當時京師稱為第一隱性不喜軍旅惟與丞相
杜建徽善王初城西府命賓寮巡覽顧謂左右曰百
步一敵樓足以言金湯之固隱徐曰敵樓不若內向
為佳及徐許之亂人皆以為先見一日隱寢疾王親
臨撫問因題其壁云黃河信有澄清日後代應難繼
此才隱起而續末句云門外旌旗屯虎豹壁間章句
動風雷隱由是以紅紗罩覆其上其後果無文嗣隱
累官錢塘縣令尋授鎮海軍掌書記節度判官鹽鐵
發運副使授著作佐郎司勳郎中歷遷諫議大夫給
事中賜金紫卒年七十七歲所著江南甲乙集淮海
寓言及議書後集竝行於世初新登羅江常有二氣



亘於江上晝夜不滅及隱泊丞相杜建徽生而二氣不復見識者以為文武秀氣焉

庚午四年春二月湖州高豐導淮將李簡陳章等入其

境都將盛師友沈行瑜閉門不納王遣子元瓊濟師

禦之淮人挾豐而遁豐高彥第三子也初彥夢一羽人持劍入臥內彥驚問其故羽

人荅曰來為君之子報數千人冤耳其母自是而孕不足月而生豐年十三四即性暴虐及嗣父位恣行

殺戮將吏侵晨入衙必與妻子訣別而入每登清暑樓眺望則州城東西水陸行人亦皆絕迹豐夜又精

也常請太常博士邱光庭校書於樓中豐亦嘗往觀之一日豐履襪而登光庭不知因迴顧見一青面鬼

遂大呼俄而見豐密言曰博士慎勿言是驗之也又召鄉丁為衙軍號儕要都皆文其面衣青衫白袴緋

抹額凡所指令必躬身仰首如夜叉之狀刀鎗弓矢常居左右又令州人皆黥面約三日當畢過限則誅

將敗召羣吏議曰我欲盡殺百姓可乎吏對曰百姓

租賦所出殺之無可取供給願求他可殺者時親紀

二丁軍三千餘人曾有言其怨嗟者集於開元寺給

日將饗汝因閉三門之半而納之入者旋殺逮半在

外者方覺因奔逸縱火為亂豐聞盛怒閉城大索戮

之無遺王以其兇暴滋甚將伐之由是而叛先是道

場山僧如訥以其高彥將死與其訣別退而謂其眾曰

高公將殂我亦當逝何者蓋有白面夜叉治此政矣

爾輩亦宜避之俄而豐代其父白面者蓋豐未黥面

耳豐至淮南屢取娼姬入其私室殺而食三月癸巳

王巡吳興命弟鏢為刺史癸卯至自吳興夏五月奏

改西府富陽縣為富春縣東府暨陽縣處州松陽縣

為長松縣秋七月詔原前監軍周廷詰已下二十五

人時有詔誅之王以其自前朝將亂求出避八月始

禍非端季述之黨請以原之遂有是命也

築捍海塘王因江濤衝激命强弩以射濤頭遂定基

復建候潮通江等城門

初定其基而江濤晝夜衝激沙岸版築不能就王命強弩

五百以射濤頭又親築胥山祠仍為詩一章函鑰置於海門其略曰為報龍神與水府錢塘借取築錢城既而潮頭遂趨西陵王乃命運巨石盛以竹籠植而材捍之城基始定其重濠累塹通衢廣陌亦由是而成焉

冬十月戊寅王親巡衣錦軍製還鄉歌

歌曰三節還鄉兮掛錦衣碧天朗朗兮愛日暉功

臣道上兮列旌旗父老遠來兮相追隨家山鄉眷

今會時稀今朝設宴兮觥散飛斗牛無孛兮民無

欺吳越一王兮駟馬歸

其雄辭壯氣實大風之儔也

丙戌至白衣錦城命湖州都將盛師友權婺州刺史

命斬湖州巡校將沈行思

初高澧將奔而師友行思同有閉城之功王巡吳興

乃命師友從行而行思頗有牧守之望乃謂其同職陳環曰盛君來豈不佩印綬而歸耶不然我後安處子為我裁之時環已得密旨俾遣行思歸國乃給之曰二人之功本無優劣然王情尚未可測宐亟詣府城面較功績以決其可否則行思遂來覲王亦優待之環送行思家累至行思始悟其事深銜環遂懷怨望王將及國城行思與陳環俱候於北郊行思自取巨槌擊殺環奔王舟以陳其前功復言師友與環毀聞之狀時師友方從亟引之以相證行思輒奪成鎗將刺師友左右遂擒之王曰吾早以汝強梁故不欲任始念汝閉城之効將牧之他郡而今所為若此疇能容之乃命斬於龍邱山許其家屬收葬而師友遂有命是

辛未五年春正月丙戌日有蝕之夏四月制命王守尚

書令兼淮南宣歙等道四面行營都統增食邑二千

戶實封一百戶敕遣刑部侍郎李光嗣建王生祠於

衣錦軍敕翰林學士李琪為碑文時從寮吏將校眾所請也五月

朔梁改元乾化是月築松江南北二城鑰柵畢備設

險故也秋七月敕命淮南兩浙幕府將吏五百人竝

賜贊正安國功臣九月梁主如相州冬十月湖州刺

史王第鏢殺防戍指揮使潘良懼遣遂奔淮南十一

月梁主還京是冬廣帥彭隱殂弟巖嗣

壬申乾化二年夏閏五月朔日有蝕之梁主入洛六月

梁主遇弒郢王友珪僭位秋七月遣刑部尚書李皎

尊王為尚父八月己丑城西陵

癸酉三年春正月友珪改元鳳厯肆赦二月均王友貞

舉兵誅友珪遂即位於汴京更名瑱復稱乾化敕遣

供奉官楊彥賓來宣諭三月敕授王尚父冊禮夏四

月制增王食邑三千戶實封二百戶准將李濤率兵

二萬自千秋嶺寇我衣錦王命文穆王討之生擒李

濤等八千餘人王又命子元璪帥水師攻東洲又獲

賊將李師愈姚延環等三千餘人而還五月准將花

虔渦信等率兵五千餘人會屯於宣州廣德縣將復

寇衣錦軍復命文穆王討之六月師克廣德縣獲花

虔渦信及吏卒七千餘人而還是月辛卯彰義軍節

度使檢校太尉兼侍中成及卒及字宏濟錢塘縣人也祖克評嘉王府長

史父貞國子博士及性淳厚為鄉里所重咸通中戊
戌間捍山賊逐齊寇聲名遂振及八都浸盛復分十
三都以富春鎮為靜江都將屬城漢安作亂與王同
事攻討漢宏平北關鎮將彭孟安謀亂即席奮劔將
犯王及舉胡床制之偏將盛造因執孟安就戮以功
奏遷散騎常侍復為靜江鎮將光啓中潤州薛朗叛
王命及討之時常州刺史丁從實具牛酒以犒我師
仍遣美女於諸將及取而斬之餘悉不納因克之尋
平潤州王奏及授兵部尚書充常州防禦使潤州阮
結卒命及代之累遷檢校司空尋為蘇州刺史乾寧
時淮人圍姑蘇常熟鎮將陸郢巡檢郭用與其黨趙
邯以其城應寇邯手刃其母妻子以盟城陷及以禮
見楊行密行密閱及府庫私室皆藥物圖書而已由
是重之至淮南辟為行軍司馬及拒之曰及以百口
託於錢塘不幸城陷於牧以至於此豈宜復以本道
符竹援富貴於鄰境不惟丞相不可百日其謂我何
乃引佩刀自刺行密遽止之因厚禮而歸焉累署鎮
海軍節度副使奏授司徒至太傅天復中王巡衣錦
軍命武勇都將士以治溝洫軍中多怨言及慮有變
亟請罷役王不聽俄而作亂及護王駕回至北郭王

微服將入城及乃代乘王車行與賊鬪王遂得入王
性嚴急每有所檢發必亟加斬決或及至王雖盛怒
必為之解其寵遇皆類此也累奏授贊正安國功臣
保大彰義等軍節度使開府儀同三司檢校太尉贈
太師兼侍中冬十月敕加文穆王開國爵邑是月乙
酉大同軍節度使駙馬都尉王子元瑛卒也瑛王長子
國莊穆夫人吳氏原名傳錯後更名焉性英敏頗尚
儒學聚書千卷善草隸好施時徐綰之叛城中有錦
工二百餘人皆潤人也瑛慮其為變乃命日王令百
工悉免今日工作遂放出城而發懸門王入城聞其
事頗嘉之尋為兩浙副大使梁太祖拜為駙馬都尉
累授大同軍節度使同平章事公主未及降而薨年
三十六敕十二月王命子傳瓌權蘇州刺史
贈太師
甲四年夏六月制授文穆王開國侯食邑秋七月廣
帥彭巖遣供軍巡官陳用拙奉禮幣請兄事王王納

之九月命文穆王率兵攻常州無錫縣獲將卒五百餘人而還

乙貞明元年春正月朔改元大赦是月敕授文穆王以下官爵有差甲午王親巡衣錦軍二月敕遣給事中韋彖金部郎中李發選王子傳珍爲駙馬都尉閏二月己亥王至白衣錦軍

丙二年春正月敕授浙東營田副使常州刺史杜建徽爲涇原節度使王命建徽護送傳珍進京師尚壽春公主遂授此任秋七月

敕授王爲諸道兵馬元帥冬十二月王命恩州防禦使弟鐸率官吏僧眾詣明州鄞縣阿育山寺迎釋迦

舍利塔歸於府城仍建浮圖於城南以致之

浮圖凡九層八

面高三百七十尺中外皆通旋繞共制度皆出王之心匠焉

丁三年春三月敕授王子贊正安國功臣鎮海軍北而水陸都指揮使金紫光祿大夫檢校太保守湖州刺史大彭縣開國子食邑五百戶傳璟贊正安國功臣鎮東軍節度副使土客諸軍都指揮使兼北面行軍招討光祿大夫檢校太保守蘇州刺史大彭郡侯食邑一千戶傳璪贊正安國功臣鎮海軍節度副使土客諸軍都指揮使金紫光祿大夫檢校太保大彭縣開國侯食邑一千戶傳球贊正安國功臣鎮東軍

東面水陸安撫都指揮使光祿大夫檢校太保守溫
州刺史大彭縣男食邑三百戶傳璵贊正安國功臣
鎮東軍西面安撫都指揮使光祿大夫檢校太保守
睦州刺史大彭縣男食邑三百戶傳懿贊正安國功
臣鎮東軍親從都指揮使兼土客諸軍安撫副指揮
使銀青光祿大夫檢校司徒守贛州刺史傳曜贊正
安國功臣鎮海軍上右廳都指揮使兼土客諸軍安
撫副指揮使金紫光祿大夫檢校司徒前明州刺史
元球贊正安國功臣衣錦軍防遏都指揮使金紫光
祿大夫檢校司空守義州刺史傳瑋贊正安國功臣

鎮海軍衙內先鋒指揮使金紫光祿大夫檢校司空
守峯州刺史傳珣贊正安國功臣鎮海軍節度上押
衙充安國衣錦軍親從副指揮使兼兩直都虞候金
紫光祿大夫檢校尚書右僕射守巒州刺史傳玘贊
正安國功臣鎮海軍節度右押衙充上直都知兵馬
使銀青光祿大夫檢校尚書左僕射傳肅等十一人
各授官秩階爵及遙郡有差夏四月詔諸道兵馬元
帥府開幕除吏一同天策上將軍府故事是月復以
峯州刺史傳珣守檢校太保餘如故冬十月敕遣吏
部尚書李燕中書舍人韋說授王天下兵馬都元帥

是月黃龍現於卞山之金井洞命立瑞應宮

一作祥應宮

寅四年春三月朔四星聚斗王置元帥府僚等官敕

授兩浙行軍司馬秦州節度使平章事馬綽守檢校

太尉同平章事行軍餘如故夏四月廣帥

大漢皇帝年號大有

進士王詡之在南海著昭陽賦一篇序曰皇帝基構乾坤十有八載矣甲子春始作茲殿計共甲子則巖本年僭號今據皮氏舊錄而書之云前年丁丑僭號其誤明矣

六月西川王建殂子衍嗣改元乾德王命子元球權

衢州刺史命鮑君福等率兵攻信州斬淮將李師造

生擒偏將馮一

一作敏等一千餘人刺史周本僅以身

免秋八月制授涇原節度使杜建徽守檢校太傅同

平章事冬十二月淮人圍虔州將絕我貢路刺史盧

光儔來告王命徵兵援之未及境而虔州拔矣航海

入貢自此始也

卯已五年春三月敕文穆王伐淮南夏四月淮帥楊渭

又名隆演僭稱大吳皇帝年號武義文穆王率師與

淮人戰於狼山之江大敗淮人斬賊將百勝軍使彭

彥章生獲士卒七千餘人制以湖州刺史大彭縣開

國子王子傳璟為宣州宣國軍節度使同平章事秋

七月我師復攻毘陵因戰於無錫指揮使何逢吳建

死之遂班師八月淮人以狼山之敗遣偽客省使歐

陽汀來請通好王納之息民故也自是休兵民樂業二十餘年九月朝廷以南海僭號詔我師伐之

制曰朕聞綱紀亂常前王無赦懲惡勸善有國不私苟罪惡以顯彰在刑名而何道其有身當閒關寄受國恩敢行不軌之心具驗速辜之迹頒行典憲仍命誅夷靖海建武等軍節度使嶺南東西道觀察處置供軍糧料市舶等使開府儀同三司檢校太保兼中書令持節都督廣州刺史上柱國南平王食邑五千戶彭城巖頃因乃父發迹大藩尋賴其兄致身賓席受先朝之拔擢極上將之寵權念

其尊獎之誠許繼藩宣之任巖乃自行軍之職繼膺推轂之恩秩進三司位同四輔自朕獲承大寶累進崇資一門無比其超榮百世豈疇其寵耀而敢飛章不紀希寵無厭始求抑紀四鄰後請封王南越貪饗斯甚踰僭偕朕每合容再申優渥授之東鎮加以南平比罔思知足益恣兇狂妄稱漢室遺宗欲繼尉陀醜迹結連淮海阻塞梯航徒惑遠方僭稱大號在人情而其棄豈天道以能容宐命討除用清逆亂爾天下兵馬都元帥錢諱志扶廟社任總兵師每興憤激之辭願舉誅夷之令是用

俾于元老平彼叛臣先行奪爵之文爰舉摧兇之
 典其彭城巖在身官爵竝宜削奪仍委指揮征討於
 戲將相重任子孫殊榮不能常守於藩修而乃自
 干於國典指兇殘而必取念汚染以將新非我無
 始終之恩蓋爾有滿盈之罪凡百珍重悉體朕懷
 王雖受命而山川隔越地方擾攘請以事寢冬十一
 月丁亥吳越國正德夫人吳氏薨夫人臨安縣人也父仲忻浙西觀察
判官累贈吏部尚書初王議婚吳氏以王懿達大度
 不事產業將不許而吳世父有知人之鑒固促成之
 及歸室圍門整肅恭敬如禮王性嚴急嘗怡顏以諫
 之撫愛諸子無分彼此之親累封燕晉二國至吳越
 國正德夫人王女捨出家因建奉國寺或夫人將遊
 之王乃命帛百疋以備散施夫人曰妾備嘗機杼之

勞遽以遊賞費之非念人之道遂不受而夫人諡曰
 罷其行其仁慈節儉如此薨年六十二歲

莊穆有子十
三人

辰庚六年春二月敕授宣州節度使同平章事王子傳
 璟以下竝起復雲麾將軍上右金吾衛大將軍員外
 置同正員餘竝如故三月王命元帥府判官皮光業
 使於邗溝夏五月淮南楊渭殂弟溥嗣偽諡渭為宣
 皇帝秋七月王以子睦州刺史傳懿為婺州刺史
辛巳七年春三月王從弟鎰至自淮南王亦歸李濤以
 報之鎰以天祐二年睦州之役為賊所執李濤以夏
 乾化三年來寇我衣錦軍擒之至是各歸焉
 五月梁帝祀郊改元龍德六月朔日有蝕之秋七月

潭州楚王馬殷遣掌書記李峴馬匡送女歸於都知
兵馬使檢校尚書左僕射王子傳瓚冬十月制授文
穆王檢校太傅同中書門下平章事充清海節度使
自是賜王書詔不名

壬午龍德二年春正月敕授文穆王以下竝起復加爵

邑有差秋七月王建天下元帥府於興國門之右八

月兩浙行軍司馬秦州雄武軍節度使同平章事馬

綽卒綽餘杭縣人也性氣淳直與王同事董昌昌嘗
使王閱部伍亡其名籍王因歷唱之存亡健悴

者無所遺失綽密謂王曰董氏忌前駭此強記必相
惡乃以白籍紙數幅授王若代軍籍者由是頗德之

王因以從妹歸綽綽尋隨董氏於越及董僭號綽棄
家先奔於王乃舉奏授諸城都指揮使徐綰之亂綽

有發懸門之功王尋命文穆王納綽女是為恭穆夫
人綽累職鎮東軍節度副使兩浙行軍司馬睦州刺

史王奏授秦州雄武軍節度使同平章事卒年七十一是冬一日王晝寢夢青

衣人捧簿書於前告曰大王明年錢塘官滿及寤頗

惡之明年天子乃命王封冊中外
皆如列國之儀其兆明矣

癸未三年春二月敕遣兵部侍郎崔暕一作協刑部員外

郎夏侯昭冊封王為吳越國王受封冊建國之儀一

如典禮先一日雨雪王命李咸將卜他日咸曰大王

雙受封冊惟天所相雨雪必霽則可以卜社稷之延

永王從之即夕果星斗明麗翊日遂成其禮王建國
儀衛名

稱多如天子之制惟不改
元置百官丞相客省等使四月唐莊宗即位於魏州

吳越備史

卷一

掃葉山房

大赦改元同光是月梁亡駕入洛陽因都焉邗溝入
賀京師上書稱大吳國主乾寧中有耕者得傳國璽
以獻於王王謂非人臣家所宜畜至是獻焉五月敕
遣宣諭使通事舍人吳韜走馬自淮甸至賜王名馬
玉帶香藥等先是梁室詔敕不名至是依前不名亦
曰吳越國王焉冬十月朔日有蝕之十二月唐帝遷
都洛陽

甲同光二年春二月唐帝南郊大赦二月癸卯金吾
衛大將軍員外置同正員檢校司空明州刺史王子

傳曜卒

曜王第八子也母濟南郡夫人童氏曜性仁厚明敏好學治郡自得政體累授鎮東軍親

巡都指揮土客諸軍安撫使光祿大夫竇州刺史奏授金吾大將軍員外置同正員檢校司空改明州刺史餘姚侯終年三十惜哉秋七月西川王衍稱大蜀皇帝致書於

京師八月王遣使入貢冬十月制授王依前天下兵
馬都元帥尚父尚書令吳越國王授文穆王檢校太
師兼中書令充兩浙節度使觀察畱後十一月陞蘇
州爲中吳軍制授鎮東軍節度檢校太保兼中書令
大彭郡侯王子傳瓌一作元瓌充中吳軍節度使

乙酉三年春二月南海入賀京師上書自稱大漢國主
夏四月朔日有食之秋八月勅遣正議大夫守尚書
吏部侍郎上柱國贊皇郡開國男賜紫金魚袋李德

休等持節備禮賜王金印玉冊及沿身禮物衣冠劔履等

冊曰維同光三年歲次乙酉八月辛酉朔二十七日丁亥皇帝若曰王者惠濟黎元輯寧方夏重名器任股肱忠而能力則禮崇賞不失勞則人勸所以啓周公之土宇列漢祖之膏腴者錄彼茂勳實諸異數登進賢哲輝耀事功者也天下兵馬都元帥尚父守尚書令吳越國王錢 朝海靈源承天峻嶽以英風彰德望以勇氣贊忠貞往因義舉之徒盛推韜略遂著襲封之績高步藩維挺魚鯢鳥

鳳之姿擁岸虎水龍之眾居方面任將五十年宣導休聲攘除兇醜摧堅奮銳鄙許東固圍之謀阜俗頒條廣冀北安居之頌環塹浙江之要雲滋星紀之墟閱禮敦詩位崇元帥前茅後勁名重中權守畫一之規奉在三之節信立靡移於風雨義行曷倦於津塗効珍則那顧險難薦幣則常歸宰府振英謨而端右弼鍾懿號而異列藩可謂職貢不乏梯航時至翼戴天子加以恭也載念尊獎爰示徽章今遣正議大夫守尚書吏部侍郎上柱國贊皇縣開國男食邑三百戶賜紫金魚袋李德休

使副朝議郎守起居郎充史館修撰賜緋魚袋聶
與持節備禮胙土苴茅冊爾爲吳越國王於戲地
奄數圻賦過千乘墨守闔閭之境範圍勾踐之封
子弟量才序進多分於柴戟土疆漸海方輸豈限
於魚鹽貴盛富強雖古之封建諸侯禮優夾輔不
加於此慎厥始終無以位期驕無以欲敗度欽承
賜履協予一人汝嘉

時唐帝將議恩命於王顧羣臣曰朕從覺堂卽聞尙
父之名宜以優禮尊之命備冊禮有司仍請竹冊銅
印唐帝曰尙父元老不當待以人臣況已封建乎乃

賜玉冊金印仍以紅袍御服一副賜焉九月王大舉
兵師伐蜀冬十一月蜀僞主王衍降是月制授土客
諸軍都指揮檢校太保兼鎮海軍節度副使王子元
球守檢校太尉兼侍中充靜海軍節度使是月閩王
王審知殂子延翰嗣自稱閩國王

丙四年夏四月戊寅王不康如衣錦軍命文穆王監
戊國是月莊宗崩明宗卽位大赦改元天成秋七月庚
寅王至白衣錦軍八月朔日有蝕之九月制加文穆
王食邑一千戶實封一百戶又授中吳軍節度使王
子元瞭開府儀同三司加食邑五百戶冬十二月制

授靜海軍節度使王子元球開府儀同三司食邑五

百戶是月建州刺史王延稟殺其弟延翰一名而立

泉州刺史延均於福州延稟乃延均之庶兄也同起兵攻殺延翰延稟乃立延均

於福州而延稟歸建州矣是歲大水蘇州尤甚水中生米大如荳

民取而食之

丁天成二年春正月唐帝更名亶夏六月楚武穆王

馬殷建國秋八月朔日有蝕之冬十月車駕如汴是

月淮南僞丞相東海徐溫卒子知誥嗣十一月吳王

楊溥稱帝

戊子三年春二月朔日有蝕之敕遣監門衛上將軍烏

昭遇賜王湯藥國信等閣門等事李韞授文穆王鎮

海鎮東西軍節度使夏六月以來大旱有蝗蔽日而

飛晝爲之黑庭戶衣帳悉充塞之王親祀於都會堂

是夕大風蝗墮浙江而死都會堂即白太傅居易之虛白堂基也王重建之號

八會亭江東羅隱爲之記以王平吳定越講武計議凡八會於此故名之後更名都會堂也秋七

月己巳忠獻王生

己丑四年春二月制授文穆王杭越等州大都督府長

史增食邑實封中吳軍節度使王子元璩食邑五

百戶實封一百戶靜海軍節度使王子元球兼中書

令餘竝如故楚州陞爲順化軍以明州刺史王子元

珣爲順化軍節度使秋七月台州大水請軍儲三十萬斛八月己酉今大元帥吳越國王王孫宏俶生是月明州餘姚縣修舜井獲古佛舍利數十粒兼有珠玉奇玩王命內衙指揮使徐仁綬近侍閭邱稔往迎之因建浮圖於城北一如城南之制九月因樞密使安重誨兄弟用事於朝嘗要求不克乃矯制以王爲太師致仕仍賜烏昭遇自盡先是烏昭遇之來使也元球恩命至致性兇悞因恃酒凌昭遇由是有隙王以其辱君命止以常禮遣之攻還京師遂構昭遇於樞密安重誨重誨以昭遇失使臣之體而亦嫌王以要求不克誣王不禮君命遂同讒構命王致仕賜昭遇自盡王命文穆王奏雪其事奏不得通乃以絹書上

之天子始得聞焉出安重誨爲河中節度使是歲所狂地震居人有壞廬舍者

庚寅五年春二月唐帝南郊大赦改元長興元年夏五月制授文穆王以下食邑實封郊禋普恩也六月朔日有蝕之冬十一月楚王馬殷殂子希聲嗣

辛卯長興二年春二月敕遣監門衛上將軍張籛兵部郎中盧重賜王國信湯藥起王致仕復元帥尙書令吳越國王如故依前不名仍示安重誨矯誣之罪

其敕略曰天下兵馬都元帥尙父尙書令吳越國王錢久列王公恆輸愛戴朕方禮加元老恩遇

遠方安重誨掇綴瑕疵遽行阻絕退其權勢彼使
 錢元瓘拜闕上章傾懷請罪言皆激切事且憑虛
 盡由爾介蠱之心有誤我含容之德情不可恕罪
 不可道宜出為河東節度令已誅之以雪其冤故
 告

秋七月有象入信安境王命兵士取之圈而育焉八

月建州王延稟子繼昇繼倫奔於我蓋其為延均之

所害也

初審知薨延翰嗣位以延稟為建州延均為泉州延均不悅而延稟亦憾於延翰於是泉

建同起兵攻福州殺延翰遂立延均於福州延稟歸建州將行謂延均曰善紹先人基業勿煩我老兄再至延均聞之含憾至是將圖延稟乃詐言使軍吏迎取延稟乃殺其子繼雄仍執延稟入城延均曰果煩

蝕之

老兄再至矣延稟瞪之而就戮繼昇繼倫自建聞難而奔於王焉

冬十一月朔日有

壬辰三年春二月遣吏部侍郎盧詹刑部郎中楊薰賜

王國信湯藥等三月己酉夜大雪庚戌王薨於正寢

年八十一在位四十一年朝廷聞訃廢朝七日哀悼

不已

詔曰天下兵馬大元帥尚父尚書令吳越國王錢

本朝元老當代勳賢位已極於人臣名素高於

簡冊贈典既無其官爵易名宜示其優崇宜令所

司定諡曰武肅詔工部尚書楊凝式為碑文

夏四月庚午奉靈輜殯於衣錦軍應順元年甲午春
正月壬午敕葬王於安國縣衣錦鄉即錦北鄉茅山之原

即今臨安縣也

王始在軍中未嘗自安每欲暫憩必先整衣甲盥漱而後寢焉又以圓木小枕綴鈴睡熟則欬由是而寤名曰警枕又置粉盤於臥內有所記則書之及撫鎮二國殆及四紀勤勞恭儉始終一致每夕必列侍女各主一更戒之曰外有報事當振鈴聲以爲警省凡有聞報即時而遣又嘗以彈丸牆樓之外以警宿直者使其不寐以應其事又嘗微行

夜扣北城門吏不肯啓關曰大王來我亦不啓王乃自便門而入明日召吏厚賜之稍暇則命諸子孫諷誦詩賦或以所製詩什賜於丞相將吏以下由是往往達旦天福中近侍李詠因監契丹驛中有判官謂李詠曰武肅王嘗夜不睡詠詰其所知荅曰嘗聞五臺王子太師言浙中不睡龍今已歸矣訪其所聞乃壬辰之後也王少時倜儻有大度志氣雄傑機謀沉遠善用長稍大弩又能書寫甚得體要有知人之鑒及通圖緯之學每處獄中而神形有餘純孝之道稟於天性每春秋薦享必鳴

咽流涕嘗曰今日貴盛皆由積善所致但恨祖母不能見耳嘗於後建層樓皇妣春秋高不能上王親負而登焉天祐以後中原多事西川王氏稱蜀邗溝楊氏稱吳淮南彭城氏稱漢長溪王氏稱閩皆竊大號或通姻戚或通聘好皆以龍衣玉冊洎書疏等勸王自大王嘗笑曰此兒輩自坐爐炭之上而又踞於上耶吾以去僞平賊承天子疇庸之命至於封建車服之制悉有所由豈圖一時之事乃隨波於爾輩也皆却之而不納而諸國之主無不咸以父兄事之王加以自奉節儉衣服衾被皆用

紬布非公宴惟磁尊漆器而已恭穆夫人嘗以王寢帳隳裂乃上青絹帳請易之王曰作法於儉猶恐其奢但慮後代皆施錦繡耳此帳雖故猶可蔽風竟不易後庭有鄭氏其父嘗以罪當死左右冀其獲宥且言斯人有息女與侍王命出其女而後斬之顧左右刑者曰公柄豈可以一婦人而亂我法耶又嘗夕宴諸王子及諸孫命鼓胡琴未數曲遽止之曰外聞當謂我不恤政事爲長夜之飲宴遂罷王自開創以來至於底定而撫字將帥洎行伍莫不盡得其歡心有勳將何逢歿於賊中一日

王見其所乘馬悲泣不能止左右莫不感激
 論曰王挺命世之才屬艱難之運奮臂起義所向
 披靡以寡敵眾黃巢不犯其封仗順伐逆漢宏至
 於授首誅逐帥之薛朗遂申屬郡之禮畢作偽之
 董昌不違本朝之命加以禦淮戎以耀威奉梁室
 而示略迴江山之深險致都邑之宏麗七者充備
 五福是臻故八輔地圖三授天冊總四海之戎柄
 爲一人之父師威名赫然霸業隆矣然後內敦恭
 儉外正刑賞安民和眾保定功勳文臺崛起於江
 東元德雄據於巴右比之全德固不足同年而語



哉

吳越備史卷之一

終

天孫王后

掃葉山房



<p>...</p>	<p>...</p>	<p>...</p>	<p>...</p>	<p>...</p>	<p>...</p>
------------	------------	------------	------------	------------	------------

